



泰山志

支山  
川泉  
祠廟

四


8-10

ル 5  
3548  
4



門 五  
號 3548  
卷 4

泰山志卷第八



支山志

朝議大夫山東泰安府知府休寧金檠纂輯

社首山 1 高里山 3 介石山 4 石閭山 4

亭亭山 4 梁父山 4 云云山 7 徂徠山 7

新甫山 18 少岱山 20 靈巖山 20 琨瑞山 28

社首山

社首山在泰山南陲史記封禪書云周成王封泰山禪社首應劭曰山名在博縣晉灼云在鉅平南十三里元和郡縣志云在乾封縣西北二十六里太平寰宇記云在乾封縣西北二十六里一統志云在府西南二里明汪子卿志

云在嶽南二里許聯屬高里前代多禪此顏希深泰安府志黃鈴泰安縣志俱云在高里山之左二山相聯高僅四五丈有宋禪社首壇頌碑

顧炎武社首山考史記周成王封泰山禪社首唐書高宗乾封元年正月庚午禪社首元宗開元十三年十一月辛卯禪社首宋史真宗大中祥符元年十月壬子禪社首今高里山之左有小山其高可四五丈志云即社首山在嶽旁諸山中最卑小不知古人何取於此意者封於高欲其近天禪於下欲其近地且山卑而附嶽陞便於將事初陟高山之後不欲更勞民力耶

唐景雲臺唐書高宗乾封元年正月庚午禪社首先為降禪壇於山上旋名景雲臺

宋社首壇宋史禮志真宗禪社首

宋史太平興國中有得唐元宗禪社首玉冊蒼壁至大中祥符元年令瘞於舊所二年五月知兗州朱巽上言

泰山修封畢社首壇增高丈六尺廣五十尺詔獎之

泰安府志明洪武初居民於山中得玉匣內有玉簡十六有司獻於朝驗其刻乃宋真宗祀后土文也

辭香嶺岱覽云在社首壇東明張邦紀云四方朝山士庶無不至此辭香者舊有天仙祠元君下廟也

對岱亭岱覽云在社首山西北明李戴毛在建今廢

泰山小史泰山諸景色映襟裾城郭井戶鱗集在望

蕭協中詩峯頂平如碁局方危亭相對嶽蒼蒼草袖醉雨千畦綠麥浪翻風四月黃

環翠亭故址在社首壇西南近改闍羅殿下有石晉時石

幢

許應元同蔡行人登環翠亭詩香騎青林駐登臺翠甸新雲山存吏隱詞藻待王臣花日初亭午蘭標欲麗春憐君竹溪興竟夕對清真

蔡汝楠同許泰安環翠亭詩蒿里亭元勝風花春載柔  
還陪仙吏躅得共白雲遊仗劍蓮華淨傳杯竹葉浮如  
何葛洪宅星  
座俯芝邱

### 高里山

高里山在泰山南三里漢書武帝紀太初元年十二月禮  
高里伏儼曰山名在泰山下元和郡縣志曰高里山亦曰  
蒿里山在乾封縣西北二十五里太平寰宇記云在乾封  
縣西北二十五里一統志云在府西南三里又名亭禪山  
明汪子卿志云亭禪山一名高里又名蒿里聊屬社首在  
嶽南三里泰安府縣志俱云在縣西三里  
云在泰山南三里左有高里神祠後人謠名亭里泰山道  
里記云亭禪山本名高里山崔嵬類龜

顧炎武高里山辨泰安州西南三里俗名蒿里山者高  
里山之譌也史記封禪書十二月甲午朔上親禪高里  
漢書武帝紀太初元年十二月禪高里注伏儼曰山名  
在泰山下乃若蒿里之名見于古挽歌不言其地漢書  
武五子傳蒿里傳兮郭門闕注師古曰蒿里死人里審  
若此山為死人之里武帝何所取而禪祭之乎自晉陸  
機泰山吟始以梁父蒿里竝列而後之言鬼者因之遂  
令古昔帝王降禪之壇一變而為閻主鬼伯之祠矣漢  
書上親禪高里師古注曰此高字自作蒿下之高而死  
人之里謂之蒿里其字為蓬蒿之蒿或者誤以高里為  
蒿里混同一事陸士  
衡尚不免况餘人乎

### 玉仙石岱覽云在高里山陽片石瑩潔

泰山道里記乾隆二十六年知縣程志隆廣栽松柏培  
護之道三十四年工人采石自洞門上下劈去數丈而  
形勢遂  
失其舊

### 古仙洞泰山道里記云在高里山陰譌謂鬼仙

泰山小史洞深暗余同好奇友窮之執燈籠火種入始  
尚寬稍入則隘乃得一窟如智井而淺躍身下路亦寬

且隘如是者再則四壁皆山洞若突厦可容三十餘人  
石牀一石磴二登牀捫其頂亦一窟上有巨石塞之旁  
無所通雖陰森襲人然微有氣氣  
風濤聲不知何來或水由地中行耶

### 介石山

介石山泰安府志云縣南四十里泰安縣志云城南四十里泰山道里記云城南四十里岱史云宋眞宗大中祥符元年禪於此按宋史無其事

### 石閭山

石閭山在介石山南二里史記封禪書云石閭者在泰山下陞南方方士多言此仙人之閭也漢書武帝紀太初三年夏四月修封泰山禮石閭一統志曰在府南四十五里泰安府志云在縣南四十里石皆礪礪攢處如村墟羅列

古帝王降禪之所泰安縣志云介石山南二里許其山有尋眞洞朱孝純圖志云在泰山南四十里

### 亭亭山

亭亭山在石閭山南三里史記封禪書云黃帝禪亭亭應劭云亭亭山在鉅平北十餘里水經注云汶水又西南逕亭亭山東括地志云亭亭山在兗州博城縣西南三十里也一統志云在府南五十里泰安府志云在介石山南泰安縣志云在石閭山南朱孝純圖志云在泰山南五十里宋眞宗大中祥符元年封山神爲廣禪侯於山上建廟祠之

### 梁父山

梁父山在泰山東南九十里史記封禪書云古者封泰山禪梁父者七十二家而夷吾所記者十有二焉括地志云梁父山在兗州泗水縣北八十里元和郡縣志云在泗水縣北八十里西接徂徠山一統志云在府南一百十里新泰縣西四十里泰安府志云徂徠西南距城九十餘里泰安縣志云在縣東南九十里汶水之陽漢時以山名縣隸泰山郡泰山道里記云大汶口東南三十里為梁父山平衍突出其上舊有地主祠

按史記八神二曰地主祠泰山梁父蓋天好陰祠之必於高山之下小山之上命曰時說文天地五帝所基址祭地也秦本紀祠上帝於西時索隱註時址也言神靈之所依止也漢郊祀志顏師古註如種非時之形於時中各為一土封祠之必於高山之下是則凡土高處皆曰時也按史稱禪云云者九禪亭亭者一禪會稽者一

禪社首者一無禪梁父之文然自秦漢以來侈言封禪無不以梁父與泰山並稱白虎通云增泰山之高以報天附梁父之基以報地明天之所命功成事就有益於天地若高者加厚者益厚矣又曰梁甫泰山旁山名三王禪於梁甫之山梁者信也甫者輔也信輔天地之道而行之也泰安縣志謂梁父雖有專山亦岱下小山之總名也孔子邱陵歌所謂梁父迴連是已府志云云云山在梁父之東亦稱梁父與新泰萊蕪聯界新泰縣志有梁父山蓋從云云山之別稱則知降禪諸山皆可稱為梁父矣史記上至梁父禮祠地主蓋古者降禪他山先祠於此今壇址無存今其旁猶有梁父村南為梁父城漢時置縣屬泰山郡水經注引開山圖云太山在左亢父在右亢父知生梁甫主死

漢諸葛亮梁父吟步出齊城門遙望蕩陰里中有三墳纍纍正相似問是誰家墳田疆古冶子力能排南山文能絕地紀一朝被讒言二桃殺三士誰能為此謀相國齊晏子

晉陸機梁父吟玉衡既已驂羲和若飛凌四運循環轉寒暑自相懲冉冉年時暮迢迢天路徵招搖東北指天漢西南升悲風無絕響元雲互相仍豐水憑川結霜露彌天凝年命時相逝慶雲鮮克乘履信多愆期思順焉

足憑懷嶺臨川響非此孰為  
 典哀吟梁父嶺慷慨獨撫膺  
 氣化坐盈侵寒光稍眇秋塞日御不停陰星箭極迴變  
 河駕騰參颺風折暮草驚葦隕層林時雲靄空遠淵水  
 結清深奔樞豈易細珠庭不可臨懷仁每多意履順孰  
 能禁露清一唯促緩志且移  
 心高歌步梁父歎絕有遺音  
 唐李白梁父吟長嘯梁父吟何時見陽春君不見朝歌  
 屠叟辭棘津八十西來釣渭濱寧羞白髮照清水逢時  
 吐氣思經綸廣張三千六百鈞風期暗與文王親大賢  
 虎變愚不測當年頗似尋常人君不見高陽酒徒起草  
 中長揖山東隆準公入門不拜騁雄辯兩女輟洗來趨  
 風東下齊城七十二指麾楚漢如旋蓬狂生落魄尚如  
 此何況壯士當羣雄我欲攀龍見明主雷公砰訇震天  
 鼓帝傍投壺多玉女三時大笑開電光倏燦晦冥起風  
 雨聞闔九門不可通以額叩關關者怒白日照吾精  
 誠杞國無事憂天傾窾翁磨牙斃人肉騶虞不折生草  
 莖手接飛猱搏雕虎側足焦原未言苦智者可卷愚者  
 豪世人見我輕鴻毛力排南山三壯士齊相殺之費二  
 桃吳楚弄兵無劇孟亞夫哈爾為徒勞梁父吟聲正悲  
 張公兩龍劍神物合有時風雲感會起屠釣大人峴岬

富安

明何景明梁父吟君不見泰山高高梁父在其半古來  
 封壇禪地無宮館崖崩壁坼鐵鎖斷秦碑漢碣何人看  
 自從生人開九州九十六帝行權謀虎豹啖食龍蛇憂  
 朝翻暮覆作雲雨立談坐笑生戈矛君不見田疆論功  
 爭二桃齊門三邱薤野蒿又不見魯連辭賞輕千金却  
 秦救趙何雄豪眼前無人辨曲直身後聲名更何益拂  
 袖空憐蹈海心護車枉負排山力梁生五噫歌莫哀東  
 絕梁父觀蓬萊千年雲開錦繡壁五色日抱金銀臺贏  
 洲方丈列仙占文成五利何能驗徐生入島竟不同博  
 士儒生盡坑塹我吟梁父君振衣世路崎嶇多是非琅  
 玕芝草海岱曲鈞  
 竿拄杖從今歸  
 國朝施閏章泰山梁父吟山高多烈風鬱鬱少松柏側足  
 凌天門浮雲蔽碣石辛勤紀封禪茫昧探玉策攘攘七  
 十君一逝無陳迹上為羣仙居下為萬鬼宅言當采芝  
 食使我生羽翮攬裳不及餐白日何促迫生非孔顏徒  
 百年亦何益何况蕩  
 陰里空埋壯士魄  
 桑調元梁父吟和李太白韻我作梁父吟長懷方子春  
 海山窈冥失島嶼海水汨沒無涯津成連訪其師刺船

去海濱牙生獨得海山海水之古意七條冰上彈紛紛  
萬古鍾期只一箇無言讚歎心相親又懷榮啟期天生  
萬物幸為人更幸有生生在中國中不乞金丹西王母  
不求大藥東王公九十帶索行歌風鬢髻白髮飛秋蓬  
乘化待歸盡安貧樂道何其雄此間煙月浩無主矯首  
仰天見河鼓河東河西癡牛駘女不耕不織含淫思秋  
期已過涕如雨誰教罰向營室居聘錢久逋天帝怒嶽  
帝感我之丹誠借我丈人峯頭高臥永不傾我不管小  
兒女銀河一片支機石亦不管古帝王金盤千尺承露  
莖有時起來騎白虎飛蹴七十二峯無所苦拋棄塵埃  
良足豪神仙富貴輕如毛冷笑長源一品啖煨芋曼倩  
三次偷蟠桃何況銅山金穴聚溷猥且勞今年已六十  
曠蕩了不悲只須脚踏霞嵐遍五嶽底用手攬風  
雲際一時大笑狂歌李太白歌不同科兩得之

### 云云山

云云山在泰山東南百里史記封禪書云無懷氏封泰山  
禪云云慮義禪云云神農禪云云炎帝禪云云顓頊禪云  
云帝侂禪云云堯禪云云舜禪云云湯禪云云李奇曰云

云山在梁父山東索隱云晉灼曰云云山在蒙陽故城東  
北下有云云亭也括地志云云云山在兗州博城縣西南  
三十里也一統志曰在府東南一百二十里泰安府志云  
在柴城之東距城百里許泰安縣志云在縣東南百里泰  
山道里記云宮里鎮南三十里爲云云山培塿圓伏山上  
舊有云云亭西下一石刻賈氏書院四字傳爲元賈進士  
讀書地失其名其北有坡曰羽林村曰甘露

### 徂徠山

徂徠山在泰山東南三十里詩魯頌徂徠之松水經云汶  
水又西南流逕徂徠山西注云山多松柏廣雅曰道梓松  
也抱朴子稱玉策記曰千歲之松中有物或如青牛或如



青大或如人皆壽所謂樓松也鄒山記曰徂徠山在梁甫  
奉高博三縣界猶有美松亦曰九徂之山也赤眉渠帥樊  
崇所堡也故崇自號九徂三老矣山東有巢父廟山高十  
里北魏書地形志曰泰山郡梁父縣有徂徠山在北元和  
郡縣志云徂來山亦曰九來山一統志云在府東南四十  
里泰安府志云縣東南三十里嶽之案山也名山紀盛曰  
徂徠居羣山之中祖泰岱昆新甫金斗青雲石門九仙子  
孫儼列鳳仙筆峯東蒙金牛遙為賓主雙汶絡其面背匯  
於西南如帶結於嶺峯巒嵯峨星體俱備四面開嶂沙水  
相繆龍脈自泰山傲來之下為金牛龍山蜿蜒東注由水  
音堂踰大汶盤結於此週百六十里朱孝純圖志云徂徠

山在嶽東南三十里蟠亘奇崛脈自西南麓入故志徂徠  
自西南之團山始

輿地廣記唐省  
梁父入博城

歐陽修曰徂  
徠魯東山

泰山道里記自郡城至山北蹊徑逼窄遊岱宗而探徂  
徠之勝者則繞山之東西兩路自前而入約百餘里

團山在徂徠西南岱覽云嶢峴四圍樵蹊紆折舊有古四  
禪寺圮山南曰上峪水西流曰滄浪溝

曬纓臺岱覽云一石屹立在滄浪溝中

望山岱覽云在曬纓臺西南里許言望而難卽也有石屋  
曰老君洞

他山泰山道里記云在望山南五里為白蓮泉發源處泉

北有法雲禪寺

穀積山岱覽云在他山西南圓銳若堆粟也

廣長嶺圖志云在圖山東五里

北頂圖志云在廣長嶺東有佛寺

藥山圖志云在北頂東五里前有聚泉菴

懸珠山岱覽云在藥山東三里上有臥雲菴圯

九龍嶺岱覽云即懸珠山支峯也其下為八道溝南下為

十六峪或云石澗峪水南流

泰山道里記東崖懸石如珠此山之所  
由名也匯水為漿池南流會響水河

毛老谷圖志云在懸珠山東

乳山圖志云在毛老谷東二里述記云玲瓏秀峙舊多竹

木谿水繞前而西注古刻竹谿佳境於巖唐天寶間李白

孔巢父韓準裴政陶沔張叔明隱此號竹谿六逸堂後為

元人鹿森隱居處東南峭石壁立篆書貧樂巖演易齋諸

蹟許衡嘗讀書於此元初開國侯徂陽時珍於其地建二

聖堂後稱二聖宮稍北石洞方廣趙國麟顏曰簞瓢

泰山道里記按二聖堂即六逸  
舊基而俗誤以党竹谿當之也

李白送韓準裴政孔巢父還山詩獵客張兔置不能挂  
龍虎所以青雲人高歌在巖戶韓生信英彥裴子含清

真孔侯復秀出俱與雲霞親峻節凌遠松同衾臥盤石  
斧冰漱寒泉三子同二屐時時或乘輿往往雲無心出

山揖牧伯長嘯輕衣簪昨宵夢裏還云弄竹溪月今晨  
魯東門帳飲與君別雪崖滑去馬蘿逕迷歸人相思若

煙草歷亂  
無冬春

石介訪竹溪呈孟節兼有懷熙道詩到頭泉石是吾家  
坐石聽泉日已斜一片青衫非富貴千竿綠竹好生涯

君曾覽照頭皆雪我試看書眼亦花  
更好結為山伴侶教他葢益佐勳華

邱濬題竹谿六逸圖徂徠之山竹滿谿溪中流水清漪  
漪昔人已往不可見至今陳迹猶依稀酣歌狂飲者六

子就中最豪孔與李為龍為  
蛇誰豫知白也逃生巢父死

蕭延賀春日訪竹溪遺跡二首路入春山眼界新溪光  
岫影逗嶙峋特來空谷煙霞地為憶明廷供奉人亂石

差差會結宇疎竿裊裊舊成鄰祇今謾誦榛苓句澗道  
盤桓藉草茵六逸堂高俯碧溪名山片石業堪稽生

花無夢輝齊右捧日有懷問隴西竹掩新晴畱藥圃窗  
鳴舊雨落芹泥伊人宛在情何既兩岸春風鳥自啼

三嶺崗述記云一名三台山圖志云在乳山東南一峯特

起北巖勒獨秀峯三字傳為唐李白書下有徂徠神祠金

明昌中封護國感應侯今圯峯北懸崖瀉水為羊公河

蕭協中獨秀峯詩徂徠山翠鬱迴盤望裏孤峯秀可餐  
迴出斷煙撐日月高標清漢插闌干亭亭每作芙蓉態  
挺挺時將拄笏看到此遊人  
偏著眼漫題名姓附巖巒

萬松嶺圖志云在三嶺崗北下有石屋甘泉出其側

徂徠絕巔泰山道里記云亦曰太平頂在萬松嶺北十里

雙峯頡頏老松數十株偃覆其上古有感應侯祠今竝其

基亡矣

元王野人詩徂徠山下是吾家吸露噓風臥紫霞幾百  
年來無箇事朝朝坐對老松花  
翠滿竹溪雲滿山晨

鐘暮鼓疊煙鬟天光一線  
開丹嶂獨坐松篁杳靄閒

紫霞洞圖志云在絕巔西

李源砦圖志云在絕巔西南旁有自來泉

貴人峯圖志云在乳山東六里孤秀插天峯東南跨澗有

橋名曰隔塵橋西為升仙臺北為隱仙觀有竹溪元圃丹

壚桃源諸景趙國麟題刻徂徠第一桃源深處

泰山道里記明萬歷中有于仙號蜃虛者闢此修養有年蟬蛻完真觀門外古木夾徑多桃竹曲水匯池南流國朝徐德謙宿隱仙觀西堂記行李投巖畔雲根迥近牀四山寒葉響一枕急流涼客思清如許秋宵永不妨雞聲驚曉夢歷歷出松篁

桃花峪岱覽云在隱仙觀西南二里

泰山道里記自觀東石屋東闢有天然丹竈傳為于仙煉丹處

小普陀巖岱覽云在貴人峯南二里

礫石峪述記云在桃花峪東石坡廣數畝飛瀑雪浪勢若建瓴

女智崗泰山道里記云在三嶺崗東六里

青風頂圖志云在礫石峪南

臥石山岱覽云在青風頂下奇石絡繹如羊或謂之叱羊

山

天平前砦圖志云在青風頂西南三里

泰山道里記赤眉所堡即此地極平曠象石為臺基址猶存

風門口岱覽云在貴人峯東四里有西別谷

釣魚臺岱覽云在西別谷東南里許

嶧山圖志云在西別谷東南三里山南朱櫻夾岸曰櫻桃園

演馬嶺岱覽云在嶧山東二里圖志云嶺巔有趙州菴南下為東別谷

砦山述記云在演馬嶺南五里

薤山泰山道里記云在砦山東五里藍谿出焉其上為光

化禪寺東南里許一巨石刻北齊時隸書大般若經

圓瓦崖圖志云在薤山東北前有大悲菴

映佛巖述記云在圓瓦崖東南三里上刻隸書般若波羅

蜜經

黑山岱覽云在映佛巖東一里

松山岱覽云在黑山東五里前有松巖洞

甯蒙山岱覽云在松山東南一里其山兩穴可通曰甯蒙

洞

兩埠山岱覽云在甯蒙山南里許兩山對峙如岸已上徂徠之陽

芍藥峪泰山道里記云在絕巔北二里峪東北三里為紫

澗池

花坡述記云在芍藥峪西北二里

中軍幃泰山道里記云在花坡北二里以地處徂徠適中

也康熙間建三清殿前有地洞深暗西為招軍石周多石

春旁有鳴旺泉下為大峪

玲瓏山圖志云在中軍幃北五里上有野人洞唐開元間

王希夷隱此

金魚石圖志云在中軍幃東二里巨石中劈半踏於地上

下魚痕宛在傳為金魚化龍處

長春嶺述記云在金魚石東五里黃壤秀異周袤約十里

下有宋石介徂徠書院今遺址猶稱為講書堂旁有姜潛

別墅曰讀易堂

天平後砦圖志云在長春嶺北

泰山道里記按此砦去中軍幃不遠皆樊崇聚兵處有演武場柱窩遺蹟

燕子石屋述記云在天平後砦東北有龍谿水逕其側危

崖瀑流而下曰濯龍灣

西仙霞隴泰山道里記云在天平後砦東北

鳳鳴山泰山道里記云在西仙霞隴之東若鳳舉其首也

黃峪圖志云在鳳鳴山北

東仙霞隴泰山道里記云在鳳鳴山東

虎穴山岱覽云在東仙霞隴東

牛山泰山道里記云在虎穴山東山南有朗僧洞神化

山北有大藏峪

角山圖志云在中軍幃西四里兩峯竝峙故名山上兩石

卓立橫石且其上曰鞦韆架

大砦口述記云在角山西迤東陡岸幽谷為鴈愁澗

攢石崗泰山道里記云在大砦口西北三里北崖篆刻竹

谿二字圖志云西北為金党懷英所居顏其室曰竹谿菴

圮康熙間於其地建玉帝閣

轉山岱覽云在攢石崗西北

嶠岫山岱覽云在轉山西

吳山岱覽云在嶠岫山西已上徠之陰

趙國麟遊徠山記徠列泰山前猶老人几泰山坐而憑之尚偃其背若將俯焉以故羸徠者殊衆然松徑竹溪名藉甚典冊中心竊疑其必有異每欲邀同人遊荏苒幾十五年不克遂康熙癸巳九月徠道者邱

師以木瓜三枚餽大倍常品色深黃幽馥內蘊問所由  
 產曰樹生礫石峪石罅中歲可得數十枚子曰異哉因  
 與邱師約廿二日丙寅同內兄黃子微野門人張子漢  
 張金子與參往遊焉行三十里小頓於團瓢至汶河沙  
 平水淺一望無際隔岸諸峯翠黛撲人眉宇渡河數百  
 武道旁豐碑大書宋太子中允徂徠石先生神道乃太  
 史宋繹田先生所建者銜書山西太原平定州判此先  
 生劾閹黨被黜時也殆感慶歷聖德軼事而題此碑乎  
 緣山西行數里一峯哈呀啤勢欲飛墜邱曰此攢石  
 崗也竹溪六逸堂在其下又數里山隈叢樹森鬱殿宇  
 廊舍若人冠巾憤雜立其中邱曰此四禪寺也又十餘  
 里至茅茨薄暮矣山巔野燒明滅如雲月隱現邱指山  
 半紺碧相間若樹若石者曰其中為十六峪轉而東行  
 五六里至山陽高子靜遠家叩門登堂菊英遶屋亭軒  
 甚幽主人篝燈放酒縱談徂徠之勝以二聖宮礫石峪  
 為最廿三日飯於高子孟兄希程家高子昆仲具肴盥  
 以葫蘆盛酒使小奚肩之出村未半里東北一峯鬱確  
 上銳張左右翼中權奮勇爭先渴驥奔猊勢不可犯峯  
 前去巔不數尺殿閣皆露鷗吻蒼松數株與石色相亂  
 高子曰土人名此峯為三嶺崗其東北為礫石峪其西  
 北為二聖宮請先從西北入子曰諾行二三里甫入山  
 道北為二聖宮請先從西北入子曰諾行二三里甫入山  
 道上怪石星羅棋布支麓起伏皆作峯巒迴環映帶步

移形換浴溪行里許西北一山端巖靜正三泉出山趾  
 匯而為池清鑑毛髮渡大溪北望諸山層巒疊嶂相爭  
 相讓而出其最高者為太平頂其西為桃花峪其南為  
 毛老谷又循小溪而北兩山漸狹大石障其前幾無所  
 見下騎步行從石東轉上忽現一境青松紅樹參差上  
 下依山為閣茅屋數椽叢篁繞之門前石梁橫亘流水  
 潺湲其上同人皆驚歎為仙境渡石梁至閣下遙瞻閣  
 上兩像竝坐東為老子西為孔子此二聖宮所由名也  
 坐老聃於左豈惑於史遷問禮之說歟抑尊神道尚右  
 之說歟由閣東拾級而上為三清殿其下貧樂巖為元  
 人鹿茂之隱居處鹿以儒隱於黃冠杜仁傑撰銘碑殘  
 剝不可讀由貧樂巖轉而北為演易齋大刻篆書三字  
 於石稍南草堂三楹為希程讀書小齋啟西窗千巖萬  
 壑奔赴窗下夕陽繪影眾山皆紫希程又引穿竹攀崖  
 而上有大石方廣數丈如岸墳墮地南向為洞俯而入  
 中可坐五六人希程請題洞名予顏曰簞瓢所以繼隱  
 士之志也希程設酒脯小酌問礫石峪於道者曰  
 踰東嶺可十餘里騎不得上由前山途頗坦殊遠因亟  
 命僕同邱師持襍被驅騎出山期見星而會予與徵野  
 等各持藜杖倩山中樵子作鄉導登東山樵子指道中  
 狼跡大寸許同人皆有戒心轉而南忽見一峯突兀傲  
 岸迎面而出即之甚邇似乘堙相關者樵子曰此三嶺

崗背面也踰嶺望之却在天際其東嶺如人如獸如列  
 几筵如陳簞簋如建幢如樹幟肖形賦物不一而足東  
 行至一嶺石皆蛙形俯仰向背跳躍聚散大小數百頭  
 下嶺北行至風門口燠黑無所見忽聞羣狼嗥鳴悲慘  
 激烈巔髮上指樵子大聲疾呼同人叱咤繼之響震巖  
 壑過風門口東下又聽犬聲四起與人聲狼聲啞啞叫  
 嘯嗷嘈喧喧應山鳴谷應樵子曰將至矣稍前人聲漸近  
 道童來迎于左手拍道童肩右手扶藜杖行落葉中索  
 索有聲履滑將仆者數下視澗中樹石查牙虎豹踞踞  
 虬龍怒拏羅刹變相倏忽萬端險不可測將下嶺樹中  
 火光熠燿道人持燎相迎從樹下度溪到院中悄悄夢  
 幻似不從人間來也煉師解純一鄒平人深情古貌少  
 習黃石家言設山中蔬果飯客言開山于仙尸解事媿  
 媿可聽久之邱師來秉燭引同人從屋後緣古藤梯石  
 而上木瓜竹樹叢生石中石巔倚崖為茅屋屋東上為  
 純陽閣閣東南上又為玉帝閣閣前砌石為闌火光中  
 見諸樹砂盡出閣下閣東曲室解師丹榻也子曰今晚  
 當借蒲團一片地矣就寢夢中猶涉危峯不得上數驚  
 覺殘月入窗狼聲遠來枕上淒清欲絕披衣起坐視窗  
 外月光漸白味爽啟戶閱昨夜諸境恍如隔世事所寢  
 曲室在懸崖絕壁之上古柏之巔乃知身臥鶴巢猿窟  
 中也從院中遙望貴人峯孤秀刺天上下如削西刻其

首有同半圭出門外西溪流水從大石下引過門穿  
 竹根浸灌蔬畦圃外古樹彌望黃葉半脫微聞丹碧由  
 圃東上嶺遊陳搏酣睡處側身而入為門直身而立為  
 洞鞠身而登為樓轉身而臨為臺聳身而上直凌其頂  
 為峯皆大石磊磊自相倚著疑有巨靈負而疊之循嶺  
 北半里許為煉丹爐石更大於陳搏睡處渠渠夏屋深  
 廣軒豁中有天然丹竈東南諸峯軒軒霞舉皆具飛昇  
 之勢下嶺到澗中老樹怪石觸目皆東坡藍本登南山  
 小普陀巖正拱貴人峯下巖過小澗登西山山中田父  
 攜雞酒來助道人供客同人遊興愈豪飯後登純陽閣  
 從閣下至貴人峯下仰視曉峭雲端一柱幾欲擎天定  
 有仙人瓊館設青精石乳以待但能化作猿猴騰身  
 直上耳轉而西觀于仙葬衣冠處下大小石梁選大石  
 倚崖環坐四望嶺中曠如奧如兼擅其勝浮大白話山  
 中雞犬桑麻大類桃源人說避秦事不復知外間尚有  
 魏晉同人皆神怡心曠樂而忘返解曰立夏三日則櫻  
 桃熟赤珠映日火齊萬樹百鳥飛鳴聲中簫管坐磐石  
 餐丹砂吸寒露沁入心脾爾時先生肯來遊乎子曰來  
 解曰深秋巖壑盡變楓林霞烘雲染丹朱萬狀猩血浸  
 人袍袖眩日醉心爾時先生肯來遊乎子曰來解曰峪  
 東為光華寺又東為大悲菴西北為中軍嶂又西為紫  
 源池此徂徠幽境也先生肯遍遊乎子曰總候櫻桃紅



葉時當辦幾量履踏盡徂徠萬壑雲耳時日已下春希  
程靜遠同田父俱去予與諸子復畱山中晚登西嶺尋  
來時路問諸峯名於解師為作遊記張本廿五日辭解  
師出山過遙瞻門度隔壑橋行兩山間奇石絡繹令人  
應接不暇將出谷中西偏一山自巔及趾如羊數千頭  
立者臥者跪者觸者齧者乳者舐者負者奔者登者墜  
者大者如羝小者如羔予謂徵野曰此君家初平叱餘  
之石也稍南為女智崗轉西行二三里至天保莊遂乘  
騎經三嶺崗前麓山川映發標新領異無一來時舊境  
廿六日別高氏昆仲一路望徂徠諸峯如逢故人矣三  
十里至汶河南岸拜徂徠先生墓觀先生所作墓表為  
孔彥輔書先生集中有拜掃堂記云石高五尺廣二尺  
三寸厚一尺列辭二千三百六十八字信然然堂已圯  
石已泐字已闕且始祖以下三十二墳碑多湮沒存者  
僅碑額數字而已予讀徂徠集孔孟仁義之言未嘗離  
口其文嶙峋碑碣礫硤歷落而浩然之氣布濩行間真  
具體子與氏之氣象者夫山之奇奇以石泰山巖巖藏  
萬仞之石而不以石顯徂徠巖巖分泰山一支而遂以  
石著此泰山與徂徠之分即大聖大賢與賢  
人之分也徂徠不忍去者久之歸而為之記  
杜天培徂徠山賦并序徂徠汶水南流所自經也去泰  
山東南三十里而近高不及泰山而廣闊配之雄偉不

如泰山而奇秀抗之宇內名山不在五嶽之數者天台  
峨嵋最為傑出茲徂徠其流亞歟夫五嶽視三公自泰  
山視徂徠殆如蕭之於曹郭之於李氣勢相高而不相  
下情實相讓而不相軋也登眺之餘因敢撫拾狀而賦  
之詞曰天作高山東惟岱宗肩隨眉列徂徠稱雄方其  
神化融結居魯之分父乾行而母坤維兄泰岱而妃清  
汶氣俯吞乎全齊體平壓乎數郡蒼茫渾厚而真源莫  
問遙睇之厥色正黑博大絕倫若鐵堆若雲屯青霓白  
霧日月吐吞仙靈潛其窟宅陰陽判其曉昏近矚之則  
疊嶺杳嶂錦攢星爛渾渾依天之石巖嶺藏龍之澗小  
峯亦自繞其煙霞偏巖亦各挾夫雷電陽陂則冬日含  
葩幽崖則六月飛霞羣巒秀而康樂為之欣起峭壁懸  
而昌黎為之悲眩爾其左澗溟渤右走嶠函北拱  
神京南以環吾孔宣尼之墓田龜島諸巨鎮絡繹森列總  
斯山之僕從兒孫而已焉其下則山足裂萬竅鳴氤氳  
盛蒙泉生皎潔而光伴星宿湍瀚而響接蓬瀛濔濔焉  
漾漾焉滙為大川徑行五百里而與黃河口合并至乃  
洞懸乳竇穴產仙蝠靈藥含滋秀草芬馥起銀雉眠瑞  
鹿貨不貴乎難得而四方走合抱之木禽不取夫珍異  
而千古無虎豹之躅又茲山之所獨也猗歟休哉霖雨  
萬方厥績彰顯而金泥玉檢之封弗之及徂徠之上交  
不諂乎梁父社首氣脈聯屬而特立拔起之勢不可狎

徂徠之下交不瀆乎有宋君子石守道人號之為徂徠先生曰魯之望也泰山魯所瞻徂徠魯之望茲其品目巍巍乎無以尚也

石介徂徠山齋熟寢家童報征西府從事田集賢元均張著作叔文趙推官庶明書至開緘讀之因題書後滿徑蓬蒿懶自鋤何人日午叩茅廬徂徠山下一枕睡經略府中三紙書兵謀貴勝縱橫出海鳥忘機飲啄餘唯章兼不讓黃初

蕭協中徂徠山詩撫池窺源紫倚竹愛溪碧古人善疎狂六逸不可即我景石先生苦心在研席地靈人傑歟日落諸峯赤

孔貞瑄徂徠懷古岱嶽南臨東海西徂徠別谷寄高樓謫仙何術能馴鳥巢父由來善樂饑茅屋微霜彫落木清霄明月滿寒溪祗今藁竹

倚倚盛六逸風流未可齊程雲徂徠山詩不爭岱嶽尊所隔猶尺咫面面成一方粵不容趾至今竹谿存千載思高軌矧其對衡門朝夕互青紫或言采昌陽可以延年祀飲酒不暇仙翁焉聊

復爾

王士祿望徂徠山詩晚步石橋上南眺徂徠山委蛇露蒼蔚翛然眉睫間餘雪一以映宛如好女顏緬昔孔裴輩借弄竹溪月嘯咏雜漁釣風俗亦清絕又聞石先生讀書山之陽父老尚能言餘韻何洋洋余既辭世網雅思侶猿鶴逝將營一椽於茲永

棲託瞻言野脚踟躕遠煙生漠漠王士正徂徠山詩雲陰移徂徠影覆汶河水下有賢人居清風被田里一抔詎能容千秋今廟祀

又徂徠懷古二首徂徠林壑美復愛竹谿清應有雲霞侶幽居遠世情釣竿想巢父酒態憶長庚寂寞空山道寥寥千載名當年石守道卜築亦于斯時際昇平日

人傳慶歷詩子孫畱伏臘水石映茅茨直道今誰繼淒然汶水湄又徂徠山下田家詩行行空翠裏明晦更多姿碧樹通村落青山向嶽祠林深鷄犬靜雨足隴苗滋他日龜陰稼躬耕亦不遲

趙執端徂徠道中萬疊峯巒裏猶存守道祠清風半山竹遺跡斷橋碑雲與泰山接泉臨汶水湄逝將棄塵俗

來此構

查慎行入兗州境望徠山青山雅淡如故人何可經  
 時不相見我行久與故人別轉向青山增眷戀來從燕  
 趙歷齊邦千里平沙黃一片眼前俗物厭勃塞物外心  
 期失蕊菡朝來雙眼豁然開已報汶流通魯甸日高螺  
 髻聳冠弁茲天遠修眉浮半面含姿獻態各自媚一老  
 道石先生六一垂銘抵佳傳聖人已遠道僅存此事終  
 應賴狂狷景行竝作泰山仰恍惚風流觀前彥白楊風  
 急不少畱片帆  
 忽過東阿縣  
 楊二酉過徠詩予家夔山麓山水有夙緣通藉近廿  
 載行役凡幾年閩海一槎渡身似蓬瀛仙往來吳與越  
 形勝靡不前已覺江湖淺况當潞河偏今年役濟上池  
 水清且漣水源五百四派出亦涓涓匯流成汶泗下濟  
 運為川我欲窮河源東岱瞻謂天朝浴浮馨濱夕陟徠  
 徠巔山松不可見蕭寺來茶煙六逸去不返空餘溪口  
 泉

成城己卯重陽前一日程蘊山明府邀同顏太守遊徠  
 徠山信宿而歸泰山之下難為山惟有徠肆兀堪追

攀翠微一帶東南際令我隔城遙望開心顏程侯妙解  
 山水趣農事方登少機務開筵峰頂作重陽鄭重前  
 戒供具太守風流澹蕩人翩翩五馬出郊園軟輿絡繹  
 不知數蓮花幕裏來嘉賓賓朋盡是江南客我亦生平  
 愛泉石悠悠泮汶渡行人斜日一鞭山影碧山中  
 名光華橫峰側嶺紛相遮不知泉聲活活出何許但見  
 丹黃照眼秋葉濃於花明日來過礫石峪步步看山  
 不足誰能脫巾高坐雲濤堆靜對西風相與掃塵俗  
 遊乘與為清娛崎嶇歷落任人扶芒鞋到處遊仙圖  
 宿再宿成須臾我聞徠七十有二三寺梵剎荒涼半  
 棄又聞竹谿名與唐賢著六逸高踪無覓處世間萬  
 浮雲馳紅樹青山屬阿誰徠先生不可作茫茫俛仰  
 空懷思掉頭一笑趁歸路奚囊懶就登高賦我將  
 獨上泰山縹緲之峰頭阿閣神房千秋萬歲住  
 王雨霖望徠徠山岱宗鬱磅礪餘勢猶嶙峋羣峯走徠  
 徠盤折五汶濱開軒獨憑眺煙雨迷芳春想見綠蘿徑  
 巖花映松筠遠慕六逸遊欲往且  
 遂巡移時山雲起直與天門鄰

新甫山

新甫山在泰山東南隸新泰縣詩魯頌新甫之柏北魏書

地形志汶陽有新甫山一統志云宮山在新泰縣西北四十里接萊蕪縣界即古新甫山泰安府志云在新泰縣西北四十里高峯插天盤結百餘里為泰山左翼舊名小泰山上有雲衢岫下有毳杖壑西有水寨溪五雲澗山前有雲孤寺岱覽云新甫山今名宮山九峯如蓮俗呼蓮花山千人洞一統志云在山西北深遠莫測

望仙臺在山前雲孤寺內泰安府志云漢武帝封禪於此見仙人跡建離宮於上遂改山名宮山築此臺今石鞦韆架猶存

明王應脩新甫山懷古新甫傳聞久登臨始見奇懸崖高巖巢斷石迴參差空翠羣峯溼微茫一徑危攀藤雲拂袖藉草露沾肌斤盡魯侯柏苔殘漢武碑山僧聊共話谷鳥暗相窺壁古龍蛇剝林深麋鹿馳汲泉供茗椀

藏火蕪松枝寂寞探元意淩涼甲古詩滄桑不可問邱壑有餘思

趙希抃春日登新甫山春山春望鬱葱葱矯首層巒切

太空間俗久傳秦禪地逢人爭道漢離宮三峯時吐嵯峨月萬木長交淡蕩風最是憑

凌情不厭尊前青眼更誰同譚其志晴望宮山苔老石翻潤雲荒峯自奇平疇遙可辨危徑到還疑天地知何意山川產若私江南追所歷

靈幻未

如斯國朝程雲登新甫窈窕攀林杪空濛極望收野泉偏受雨喬木易知秋近擁青徐出高憑岱嶽游廿年邱壑志今

日一滄洲楊繼芳宮山懷古秋色滿山巖行雲溼古樹相喚谷鳥

鳴聞聲藏其羽深洞有龍蟠巖光若帶雨夕陽隱西峯

寒煙流復聚離宮何日廢荒草埋石路歸屐印莓苔轉盼生餘慕

與岱相輔新甫山徂徠既環璋新甫亦鬱秀蒼蒼百里間

雲滂夕岫輾轉無定姿晦明相蕩漱定有靈異棲或是仙人圍漢武此築宮未必方士謬我行快瞻矚恨不躡

支山

九

巖竇為詠闕宮  
詩遙集破儒陋

施閏章望仙臺崔嵬新甫山蜿蜒百餘里連峯障日寒  
翠柏參天起宿宵巖洞深津流石髓遙見羽衣人青  
霞隨玉趾借問此為誰云是洪崖子漢武非仙才登望  
亦徒爾觀面不相識延頸眺海水千載鬱蕭條荒臺蔓  
葛藟

葉方恒游新甫山巖東古新甫其形作蓮花俗因以之  
名齊魯相矜誇立石插穹昊葉葉紛交加迴環結奧區  
中有神仙家憑虛敞南望平野耕桑麻綿延漢時宮曾  
映朱明斜莊嚴起梵宇奔走來窮遐安期不可見石洞  
流春霞

少岱山

少岱山一統志曰在東阿縣東一里橫亘郭門以在岱宗  
之西故名泰安府志云其上有臺一成臺上為元君祠臺  
下為嶽帝祠嶽祠之前為玉皇祠東麓為金山產鈴石泰

山述記曰在泰山西一百六十餘里隸東阿縣一名小泰  
山東阿縣志云泰山之西支蜿蜒迤靡至於邑境得大清  
河而止其支脈皆從東南來小泰山在邑之東郭門枕百  
步而近山不甚高大其上為嶽館有臺一成元君之宮在  
焉無谿洞古蹟故屐齒少至環抱諸山亦不可悉記也

靈巖山

靈巖山在泰山西北四十餘里一統志曰方山在長清縣  
東九十里山東通志云靈巖山四面方正又名方山齊乘  
曰即水經注所謂玉符山也上有黃龍甘露獨孤雙鶴卓  
錫石龜六泉下為靈巖寺朱孝純圖志云靈巖山古稱方  
山泰山道里記曰靈巖古方山也或曰玉符山多松柏東

晉京兆竺僧朗事佛圖澄碩學淵通初止於琨瑞山降錫焉嘗往來於此說法猛獸歸伏亂石點頭靈巖所由名也屬泰山郡唐隸齊州山在縣尋改為長清縣元屬泰安州後併濟南府山自泰山踰長城嶺西北經西棋子嶺蜿蜒挺特層崖削壁面南向周迴六十里

水經注玉水導源太山朗公谷舊名琨瑞溪水亦謂之琨瑞水也其水西北流逕玉符山

雞鳴山述記云在靈巖東北山下有臺有洞夜半嘗聞雞鳴山西巖曰麻衣洞元李堅棲隱處東北過大谿抵雙槐樹為入靈巖各路之會

泰山道里記自泰山後鳥道碌碌難行登泰山繼遊靈巖者由泰安府城西北逸山西麓而入九十里經長清境之灣德村東北逕雞鳴山下

泰山紀勝岱西有長城鉅防斐敬洞遠岱百餘里兩山夾道一水中流濼河百折異鳥奇芳足人耳目中有靈巖谷虛中如瓠路盤旋若磨山曲道斷澗深谷齒齒似欲嚙絕塵世輪蹄者有石梁可渡綠陲郁蒼似佛輞川余嘗自是經柳里莊遙望蒼松翠柏被巖麓無恒河沙數幽秀逼人而紺宇雜綴隱見天然黃鶴石田畫幀矣證明龕孤懸碧落雲靄歛移影落馬首為之神林

塔寶峪泰山道里記云在靈巖東南立石如塔中空瑩然又東跨道為坊額曰靈巖勝境

黃峴山述記云在塔寶峪東南有老虎窩

明孔山泰山道里記云在黃峴山東其山一孤南北相通盤旋北入內有石佛像再入一窟甚深山巔有靈光亭圮

國朝韓章明孔山詩何年鑿闢見神工嘉兆分明應朗公寶刹既成人已去猶雷滿月照山中

滌思峪泰山道里記云在明孔山東又東為大橫溝崇興

橋俗呼大石橋有宋釋仁欽修橋碑大觀二年郭思撰王高篆郭升卿正書南向其北面先勒元豐王臨飛白書靈巖道場四大字又東為小橫溝明空橋俗呼小石橋東有龜背石又東為飲馬溝有新石橋又西北為方山神祠又北為靈巖寺

雨花巖岱覽云在大石橋西南本名滴水崖乾隆二十一年

御賜今名泰山道里記云出上水石激泥如石雖小亦白具邱

壑

凌霄峯岱覽云在雨花巖東南又東為黃茆岡宋蘇軾登齊州雲龍山詩云醉中走上黃茆岡即此

魯班洞岱覽云在靈巖寺彌勒殿之西一曰巨和洞述記云上為十王殿外有宋宣和五百羅漢碑東北蒼崖之陽有卓錫泉又名錫杖泉傳為佛圖澄錫杖卓出者水西流匯為鏡池俗呼功德池上有卓錫亭東有二井相連碣曰雙鶴泉齊稱立鶴泉

泰山道里記金陳壽愷記云昔法定建寺患其無水雙鶴飛鳴其下涓涓果得二泉今一泉塞

懸星巖述記云俗呼功德頂在靈巖北崖最高處岱覽云青壁四削如印上平如砥方山所由名也石龕宏敞名證明龕有釋迦佛像高丈餘旁有四行者像皆因石為之龕座刻宋元題名

按北魏孝文帝本紀太和三年於方山起文石室五年建永固石室於山上立碑於石室之庭八年幸方山石

窟寺蓋謂此也

拂日巖岱覽云在功德頂迤西兩峯夾徑如雄關一名小西天北有飲虎池

積翠巖岱覽云在拂日巖西

巢鶴巖岱覽云在拂日巖南昔有雙鶴止此石坪軒豁俗

呼晒經臺前為蹲獅巖或曰盤石也

國朝于紹舜巢鶴巖詩塵踪長是羨飛鴻巢鶴巖巖恰御風十里松陰晴亦雨千重煙靄色還空列屏山似居連

舍放眼人如鳥脫籠不用憑虛更搔首恐耽詩句負青葱

又蹲獅巖詩獅峯雄踞出崔嵬烏弋誰將縮地來怒吼松濤驅虎豹閑排雲陣鼓風雷西歸欲逼星河去東望

疑從泰岱迴聞說空王降怪獸猙獰亦上雨花臺

雲窩泰山道里記云在巢鶴巖東谷口

觀音洞在雲窩南崖泰山道里記云三門相通內有石佛

東南崖多勒宋人題名有坦地約三畝不生草木曰無

生地佛家以無生為上乘故云

香霏巖岱覽云在巢鶴巖西俗呼繡毬山迤南有唐天寶

慧崇塔西北里許北峪之水南流北峪之北有石厂中

窟如井又西北二里有神寶泉

寶山岱覽云在神寶泉北上立玉皇廟東曰神谷

黃尖山在寶山北二里泰山道里記云兩崖對峙俗呼梯

于崖崖上南北二山相連曰雙峯其陽石竅蓄水甘美充

溢謂之醴泌泉

石鴨峪岱覽云過雙峯西折而東北層巒吐霧清澗含烟



尤為幽邃又東北為如巢嶼或稱棲佛洞

轉山在功德頂南

白雲洞在轉山東岱覽云白雲洞豁開向陽出證明龕南

下過轉山東折至焉

小石厂岱覽云在白雲洞下東南峭壁如削有平臺曰可

公牀明釋真可憩此崖上勒朗公傳

大石厂岱覽云在小石厂東一名半室崖容可數十人

絕景亭岱覽云在小石厂南下一名抱靈亭宋釋仁欽建

東崖有甘露泉靈巖第一名泉也

泰山道里記其地相傳為金陳壽位元杜仁傑隱居處  
即志所載觀音朝元達摩各殿故址古木參差多老檀  
編柯擁腫狀若虬  
龍志稱千歲檀也

鐵袈裟亭岱覽云在甘露泉南旁有印池

靈巖志昔法定時有鐵物自地湧出高六尺許如袈裟  
披摺之狀明人篆刻鐵袈裟三字舊在甘露泉之達摩

殿移置於  
此覆以亭

宋張舜鐵袈裟詩綫蹊針孔費慘慘鐵作袈裟  
信不凡大庾嶺頭提不起豈知千古付靈巖

國朝楊涵鐵袈裟詩紅爐不記是何辰長短誰能  
量此身莫怪至今披不起祇求豎得存梁人

仙人巖岱覽云在印池西南石壁峭特上有亭明嘉靖中

隱士李松勒巖名石上

石尾峯泰山道里記云在白雲洞南三里

靈闕峯泰山道里記云在石尾峯南峽通一線即小天門

東二里有華巖泉北為華巖寺圯北五里為野老村晉張

忠隱處

朗公山泰山道里記云在靈闢峯南西巖有朗公石狀類老僧偃立迤南為九曲峪朗公砦朗公泉

如來頂岱覽云在朗公石西南

快活巖岱覽云在如來頂西南遊者至此可憩故名

臥象嶺泰山道里記云朗公石西南為如來頂快活巖臥象嶺

象嶺

珠山岱覽云臥象嶺南為珠山有堃溝

東西磨山泰山道里記云又東雙峯圓特俗稱東西磨山

中夾蘆溝水東流

宋卞育遊靈巖記齊有靈巖寺居天下四絕之一海岱間山水之秀無出其右者僕為郡從事被檄屢到焉長廊大厦其制甚雄擊石鳴金其徒甚眾斷基壞趾古殿石闕五季之遺跡往往具在山僧引導而悉觀之涉溪

之東雙峯插天巍然對峙穹窿似可通行山僧指之曰此東天門也天門之西一峯特高其平如席寺之基趾正居其下山僧指之曰此方山也且有證明像焉其杖履而徧登之羊腸鳥道縈迂盤曲且進且卻攀緣而上者不知其幾千仞也既升絕頂山巒之形盡可俯瞰若斷若續若駐若馳屏列櫛比周環四合珍禽異獸古木怪石千類萬狀靡不睹焉僧又指曰然殊不知居天地塵埃之間而已之有軀也山僧又指曰東有朗公石西南有宛孔雞鳴二山但能引望非人迹可到者耳由山之西之清韻琳琅珠璣亂迸坐待久之舉類此矣顧謂同行者甘露泉也下有錫杖白鶴二泉舉類此矣顧謂同行者取酒藉石以竟日幽禽噪晚烟靄四合巖月亭亭松雲索覽焉其樂何可既還舍矣山腰巖腹幽亭奇榭徑從而盡覽焉其樂何可既還舍矣山腰巖腹幽亭奇榭徑從而者殆勞形者疲骨不知耶於呼智者勞心愚者勞形勞心者哀哀於簿書間不能同苾芻衆誦貝葉文優游周旋於此良可愧怍解後有期心遊目賞殊未厭之不知異日庶幾使勞形勞心者見此一悟云爾

唐李白題靈巖寺泉池詩客來花雨際秋水落金池片石含青錦疎松挂綠絲高僧拂玉柄童子獻雙梨惜去

愛佳景烟蘿欲暝時

劉長卿靈巖寺西入石路山僧候谷口石路拂莓苔深

入泉源去遙從樹杪回香隨青霽散鐘過白雲來野雪

空齋掩山風古殿開桂寒知自發松老問誰栽惆悵甘泉水何人更渡杯

錢起題靈巖諸峯向山看霽色步步豁幽性返照亂流

明寒空千嶂淨石柳有餘好霞殘月色映上詣朗公廬

孤峯懸一徑雲裏隔窗火松間下石磬客到兩忘言猿心與禪定

宋勝涉道出靈巖過題五言律十韻山半舊招提捫

蘿躡石梯佳名標四絕勝境出三齊殿古煙霞窟庭深

檜柏飛塵無路入幽鳥隔巖啼破夢泉聲急飄涼竹韻

淒微陽生頂上殘月落峯西暫到猶塵慮長居信覺迷致君功業就向此卜幽棲

鮮于頔遊靈巖松門十里蒼山曲宮殿參差倚巖腹盤

結深處時聞鐘磴道崎危蓬巖下幾派清泉在澗瀉

色朦朧出遠山忽驚星斗在簷前倦客遊來不知返清

光皎皎巖霜寒一出禪林復回顧白雲已滿山頭路

鮮于侁雷題靈巖寺馬頰筆策車馳轂終歲塵勞常碌

碌喜聞巖寺竝山中路轉清溪入幽谷乍行山口疑洞

天窮身一上翻平田千層臺殿隱林木四面石壁生雲

煙山僧迎門笑相揖為語祖師存往迹屈指于今八百

年已在西來達摩前鶴鳴飛止黃金地錫杖漏起清涼

泉境稱四絕名天下天台石橋乃其亞千峯不改歲寒

時一水最憐秋月夜半生遊學頗艱辛且向空山老此身也知方丈安禪處解笑東西南北人

宋逸登覽靈巖抖擻塵衣訪古蹤捫蘿陟嶮徹靈峯寒

堆泰嶽千層雪清遠方山十里松泉頂客回聞法鼓雲

堂僧起動齋鐘如來元現因明處直上人天第一重

金勞堪次鮮于頔韻靈巖突兀方山曲古殿般舟枕巖

腹石磴層盤林莽中芙蓉面面羅青峯菩提花散諸天

雨蒼蘊風傳萬壑鐘元烟一鶴蹠躡下巖自點頭泉自

瀉袈裟金藏不知年飛錫猶在西來前披襟向月聊放

歌聲徹東壁明河寒閑雲紛落如相顧我欲乘之入天路

元郝經遊靈巖寺岱宗西北馳倒卷碧玉環岳靈祕雄

麗勢欲藏三山初從谷口入兩掩爭屏顏漸疑下地底

細路深屈盤仰視覺天窄石井攢寒石龍噴清泉洒落

兀仁王壇桐鯨吼西風棟宇橫高寒石龍噴清泉洒落

泰山志卷八

支山

三

几案間修竹掃山色瑩綠穿雲根丹鳳飢不來寂莫青  
琅玕上方在天上下視無塵寰空霏鎖霜樹翠錦蒙朱  
殿西日迴清暉輕金滿烟寰何時脫世網挂席高盤桓  
靜境求初心滯慮驅萬端向晚蒼烟合更欲窮躋攀路  
斷不得前矯

首重一看

明許彬雷題靈巖二首古刹幽深有路通四圍山擁繡  
芙蓉曇花尚逐馱經席靈雨常隨聽法龍東澗水流西  
澗月上方僧定下方鐘五花新殿凌霄漢畫棋雕甍幾  
百重 面面峯巒紫翠連白雲深處有人烟落花泛泛  
流雙澗古塔巍巍出半天勝地連山三百里名師  
卓錫幾千年北遊不盡登臨興揮筆成詩付大顛  
薛瑄靈巖道上路入山門景便幽高風不斷石林秋照  
人霜葉紅於燒拂袖嵐光翠欲流幾過野橋橫絕澗遙  
從古刹見高樓北峯直與

天相接更擬攀蘿到上頭

徐有貞靈巖行靈巖奇絕聞天下我欲遊之久無暇年  
來治水功已成導山過此聊停駕手托天書登上方上  
方金碧生輝光回旌旆節祇樹傍問誰建此古道場後  
踞獅子前象王文殊普賢相頽頽山開由法定松偃自  
元衰法定安在哉况彼希有之如來既不見兩虎馱經  
去又不見雙鶴隨錫回但見白雲千萬堆欲動不動空

徘徊金色界中多寶塔青蓮社裏九層臺寶塔

會經幾塵劫黃龍蟠伏鉢孟水碧苔綠盡袈裟鐵嚶鳴

有鳥似頻伽步步香生蒼荀花雨紅風翠飛滿路迷

誤入山人家泉對明月和流霞茶烹蒙頂先春芽中分

三十六禪院最好無如五花殿圖畫天開當四面面面

奇觀觀不徧屬茲清和節春物方駘蕩復多繡衣人相

從共清賞主僧名至瑄精進如惠朗殷勤供香積招邀

到方丈陰閣修竹稱我酒酣來此宿西峯夜聽天雞

唱東崦朝窺海鳥浴可憐清賞殊未足無柰塵緣苦羈

束何當了却分家忙來與松子同翱翔飢餐紫玉英渴

飲甘露漿後天不老凋三光即此

便是無何鄉何必泛海求扶桑

陳鳳梧登靈巖玉符千載記方山傳得圖澄卓錫緣佛

日巖光初霽雨辟支塔勢欲參天繁松十里風濤靜立

鶴孤泉月影妍北望少林

全寶地滿山空翠鎖雲烟

王世貞再遊靈巖十二韻為捨祇園竹名山結願偏登

臨恍初地徒倚更諸天不改芙蓉色微添薜荔烟松雲

移疊嶂花落助鳴泉芒屨青從引苔衣碧任穿井猶雙

鶴浴瀑似片虹懸磬發僧歸定燈餘客借傳新茶收月

供淨甃割霞眠未叩無生理聊追有漏緣空聞飛錫杖

不見布金田盡劫終成幻降心恰悟禪祇應何所住一

鉢付  
流年

李化龍重遊靈巖十韻  
開覺路佛日上初林淨域三天曉  
化石種福地生金高閣看人代  
相巖竇見禪心峯合窺天小臺  
老檜萬龍吟聞寂消塵慮清虛  
素襟飯依欣有地慚愧未抽簪  
國朝施閭章靈巖行靈巖開鑿巨靈  
已雷天穴爛明星更遣甘霖瀉石  
鐵崖涌出袈裟古土花錯落鏤  
丹臺飛嵌層巖嶺削成石屋居  
手撫白鶴凌紫烟朗公卓錫呼  
徧視人間悲浩劫誰知梵宇亦  
世尊塵埃龍象哀唐碑宋碣紛  
靈跡摩挲恨未了倦遊一宿真  
飽飯青精顏色好

琨瑞山岱覽云在泰山東北四十五里舊名金輿山  
輿或作榆

### 琨瑞山

又名崑崙

崑崙作崑

又名金廬山

廬一作廬

水經云泰山朗公谷舊

名琨瑞溪山東通志云金廬山在歷城縣東南八十里山

下為朗公谷泰山道里記云泰山東北四十餘里為琨瑞

山東有金驢洞志稱黑風洞齊乘稱西龍洞山山勢秀拔

雙流如帶面西南向周六十里

水經注有沙門竺僧朗少事佛圖澄碩學淵通尤明氣  
縉隱于此谷因謂之朗公谷故車頻秦書云苻堅時沙  
門竺僧朗嘗從隱士張巨和遊巨和嘗穴居而朗居琨  
瑞山大起殿舍連樓壘閣雖素飾不同竝以靜外致稱  
閣也

西陽雜俎竺僧朗往金榆山及卒所乘驢上山失之時  
有人見者乃金驢矣樵者往往聽其鳴響土人言金驢  
一鳴天下太平

釋慧皎高僧傳竺僧朗於金輿谷崑崙山中別立精舍  
猶是泰山西北之一巖也峯岫高險水石宏壯谷中舊

多虎災人多執杖結羣而行及朗居之猛獸歸伏晨行  
夜往道路無滯奉高人至今猶呼金輿谷為朗公谷也  
泰山道里記自泰安府城東北踰長城嶺經玉皇嶺至  
百餘里自應城縣東南經柳埠村至八十五里琨瑞東  
南三十里為長城嶺嶺南北水  
皆分流西陽雜俎謂之分流山

金廬山岱覽云為琨瑞主峯泰山道里記云山西北為神  
通寺寺中東廊下有朗公時所浚神異井涸東有染池龍  
洞泉洞門半掩石龍半靈水自中出經青龍岡通聖橋西  
注玉水西北隅地勢幽曠中有朗公塔制最古多元時篆  
書塔銘

千佛巖岱覽云在朗公塔西泰山道里記云削崖絕壁有  
大小石佛千龕多魏齊及唐人所鑄猶有造像記二十餘  
可識

黑風砦岱覽云在千佛巖西北昔人嘗避亂於此

紅鶴崖岱覽云在黑風砦西北泰山道里記云石壁凌雲

洞心駭目大觀也又西北為季兒砦泉子峪青牛砦通天

峪巨石懸臥如梁曰仙人橋

梯子山岱覽云在長城嶺迤北東有仙人洞雲梯澗西為

仙龍潭玉水源也歷城志稱錦陽川

桃科嶺岱覽云在錦陽川西北

平頭山岱覽云在桃科嶺西北

龍集山岱覽云在平頭山迤東上有玉泉寺下為風門嶺

為劈山

天麻峯岱覽云在梯子山西

松峯岱覽云在天麻峯西下有龍池泰山道里記云左會  
涌泉之水有涌泉橋西偏有涌泉庵

屏風山岱覽云在涌泉西丹碧錯落與雲霞亂采石梯百  
有十六級上立天齊廟有黃巢洞為盤磴所掩

交戰峯泰山道里記云在松峯西北山勢突兀頂有數穴  
深不測曰雲洞東為陡谷多丹楓樹西為雲谷下有響泉

又西北為旣洪峪中有苦芭泉為苦洪 琴泉  
靈鷲山泰山道里記云琴泉又西北逕靈鷲山西有九塔

寺塔九頂門外有聖水泉  
回龍山泰山道里記云又北逕回龍山西也

鞦韆臺泰山道里記云在長城嶺北山高陰寒多積冰曰  
冰臺又名冰泉

玉皇嶺泰山道里記云在鞦韆臺西下有蔚溝臺  
瓦子嶺岱覽云在玉皇嶺北徧山皆瓦礫傳為秦皇離宮

北為齊城峪又北為白石崖  
虎頭崖岱覽云在白石崖東北

梨峪泰山道里記云在瓦子嶺西有潮音洞  
青岡嶺岱覽云在梨峪北

柏崖岱覽云在青岡嶺西上有透明洞下為柏水灣  
扶山岱覽云在柏崖西子房洞在其北深里許旁為五帝

閣東五里有子房菴有熨斗泉北六里有都泉西注會水  
簾泉

明楊衍祚子房洞詩野棠開處洞門閒俯瞰中原指顧  
間雲鑲瑤函黃石去鶴鳴琪樹赤松還沖開碧落崖千  
尺截斷紅塵水一灣回首感  
陽新月何如濟上舊雲山

三尖峯泰山道里記云水簾泉又西一里逕三尖峯南峯  
之西曰木梨砦曰龍洞峪南爲錦雲川

拔山岱覽云在錦雲川西南又西北爲黑山砦又西北爲  
楊廣砦其西爲火燄山天麻砦道溝峪出焉林壑無際內  
產朱櫻又北爲魏花砦宋指揮魏花故居也

圓通山岱覽云在天麻砦北又北爲方山砦又北爲九女  
砦泰山道里記云三石削立宛如三婦竝在雲中又名三  
媳婦砦

滂泉嶺岱覽云在九女砦北有滂泉峪嶺西爲隱士峪有  
葫蘆崖卽志所稱瓢峯也

康王山岱覽云玉水西流逕其南山之西巨石偃立曰老  
人峯

黃山岱覽云在瓢峯西北周如城郭玉水逕其北泰山道  
里記云疑卽水經注之玉符山也以錦陽川所經故又曰  
玉水齊乘云靈巖與方山相連疑卽玉符山案靈巖前後  
之水源流與朗公谷水無與則非玉符可知矣今皆以靈  
巖爲玉符山蓋因齊乘而誤

泰山志卷第八



泰山志卷第九

朝議大夫山東泰安府知府休寧金榮纂輯

川泉志

岱頂諸水

岱陽諸水

中谿

東谿

西谿

岱麓諸泉

桃花峪水

九龍峪諸水

天津河

徂徠諸水

汶水

泰境諸泉

靈巖諸水

琨瑞諸水

岱頂諸水

神泉出五花崖試心石迤南漢官儀記云南脅神泉飲之極清美利人泰山道里記云水南流達滌慮谿經對松山

而西注龍峪

玉女池圖志云在岱頂碧霞祠西池上舊有秦篆刻石明

汪子卿志云甘冽四時不涸一名聖母水池東有聖水泉

〔文獻通考〕泰山玉女池在泰山頂池側有石像泉源素  
壅而濁真宗東封先營頓置泉湍涌上徙升山其流自  
廣清冷可鑑味甚甘美經度制置使王欽若請浚治之  
像頗摧折詔皇城使劉承珪易以玉石既成上與近臣  
臨觀遣使齎石為齎奉置舊所令欽若致祭上為作記  
又云大中祥符元年五月丁丑泰山王母池水變紅

紫色

〔明〕崔文奎記太極判動靜生陰陽山鎮坤維體靜陰也  
水生天一體動陽也岱岳摩空峯巒拔起去地數千丈  
絕頂出泉流注石池清泚可鑑蓋陽根陰之象泉以玉  
女名必有所稽地志失載記云山林川谷邱陵能出  
為風雨見怪物皆謂之神岱嶽毓神上通乾象  
降靈下土坤道成女天仙玉女之號其以是歟  
〔謝肇淛〕記山頂苦乏水泉獨  
是池未嘗竭疑有神物護之

〔泰山道里記〕按古玉女池屬大闢祠基通掩於正殿會  
座下今祠東有聖水井西有玉女池并建亭遺跡皆後

人傳

〔明〕龔勉玉女池詩山池水碧澄可照

芙蓉面玉女時往來彩雲飛片片

〔程〕洪辰玉女歌英英白雲端神女駕紫鸞素姿淨浴天

池水扶桑日閃玉容丹朝餐明霞暮吸露芙蓉製眼電

為冠我聞黃帝女修真生羽翰載傳漢玉葉石屋煉金

丸西向瑤池禮王母鳴璫雜佩聲珊珊白日飛挾曹仙

去空甬丹竈鎖蒼巒黃花古洞真人跡女指纖纖印蒼

石更有一片雨花床千年指作蒲團席銀燈懸斗旁燦

若七星奕燼烟繞岩廊裊裊吐霧碧天花不捲水珠簾

甘泉迸出白玉液乍聞萬壑松籟鳴疑是經聲喧悄悄

曾頌李白句飄飄下九垓載聞宋真宗東封紫觀開寶

磬聲落天空外玉簫吹集鳳皇臺卿雲絢爛興與下朱

旛五采駕山來巍巍岱宗奠東土赫赫元君何神哉惟

山有神增靈異寰區千古仰崔巍我也生前懷仰止今

日東山著展齒十八危盤石參差萬丈雲梯空中視乘

風上天門振衣躡星紀僊樂雲中迎身如雲霧裡金蓮

頂上紫氣騰稽首風前薦香芷素手授我硃砂杯須臾

餌以白石髓揖予更上日觀峯天雞初叫朱曠起西望

崑崙雪花明玉池直接天河水夜夢石函玉虛篇傍有  
羽衣觀點指從此覓却紫芝依碧霞人世浮名一掃如  
靡風

蕭協中玉女池琳宮高揭碧山岑  
色綠繁元女髮鏡光清澈道人心翻疑借液銀河近宵  
信涵虛玉露浸恍惚水雲  
飛白簾冷冷清況起長吟

珍珠泉泰山道里記云出鬪仙巖東北崖石竅滴水如貫  
珠晝夜出斛許味極佳

裂天泉雲水池述記云在懸鼓石下夾桃花洞出焉岱覽  
云泉甘澹異於諸泉

碧天泉泰山道里記云在青帝宮東今涸

萬福泉泰山道里記云東為天街西為萬福泉

泰山小史石穴湧流甘冽異凡時中貴  
汲以羞上賜名萬福遊人多掬以洗目

蕭協中詩新祠開萬壽地脈細流通斟酌饒瑤液芬馨  
福閣宮竈瓢烹石白花巡廟泉紅繩疾非關橋傳香或  
隱龍軒巽勢驛置調鼎契宸衷賜額來雲外祥光徹澗  
中涓涓遊錫社激激兆年豐漸咽僊韶竝甘醇沉壑同  
玉盤澄霽月溪穀皺輕風元貺酬難竭重湫濬不窮  
痕腴山獻瑞石罅鬼輪工倚杖流連久塵緣一洗空

碾砣泉岱覽云在丈人峯側涸

滌慮谿岱覽云在王老石屋稍東泰山道里記云水激冽

西南流中有突秀峯

百丈崖泰山道里記云白雲洞南深谷陡峻水西南流入

石壁峪

臥馬峯泰山道里記云在西神霄山峽口渠水南流至對

松山東注龍峪

岱陽諸水

大龍口在雁翎峯北邵伯溫聞見錄云龍口泉大石有罅如龍哆其口水自中出

王惲詩峯巒重疊水潺湲石磴繁回不易攀獨倚长空頻縱目始知身在白雲間

張位詩浮雲萬里結秋陰飛瀑千尋度遠林每怪登臨風雨驟芙蓉匣裏作龍吟

大龍峪在龍門坊東岱覽云承石壁峪之下眾水所歸圖志云峽水若瀉南經飛瀑巖小龍峪西注黃西河

三义溝在老人砦朗然子洞下泰山道里記云會雙溝而西南流

潛龍澗圖志云在攔住山下水西南流入黃西河

飛瀑巖在御帳坪前泰山道里記云瀑水懸流若濺花鋪玉而下曰護駕泉明汪子卿志云以宋真宗名又曰銀河

岱覽云其下為雪花橋瀑水所經

陳鳳梧詩百丈崖高鎖翠烟半空垂下玉龍涎天晴六月長飛雨風靜三更自奏絃蒼水佩懸雲片片珠簾織月娟娟晚山倒著肩與下迴首斜陽景更妍

施閏章詩我尋古柏樹愛此巖下泉橫瀉珠簾靜斜飛瀑布懸積寒生石髮落日動山烟輦道除荒草長悲封禪年

小龍峪岱覽云在攔住山東南石峽飛流勢如龍噴圖志

云東崖兩石恰研中噴清泉曰小龍口

劉應時詩萬壑千巖赴一門蟠龍噴沫此騰奔搖空瀑布疑拖練帶雨驚波似覆盆玉竇雲深迷月窟仙巖雷動撼天根坐來忽覺魂飛越日暮歸期不敢論

玉液泉岱覽云在快活山旁石穴迸水可掬

聖水泉泰山道里記云在歇馬崖北

中谿

中谿源出岱陽黃峴嶺山海經曰環水出泰山即此水經注云環水又左入于汶水圖志云黃峴嶺又名中谿山迤東谷水湧流為中谿發源處水南流經迴馬嶺又南流七里過住水流橋

水簾泉出天紳巖下東南流注之

陳文燭記水自數千仞注於絕壑如玉虹垂地銀漢落天

鍾宇淳記泉源自天紳巖來當雨後奔流飛射噴激如萬斛明珠狀

鍾惺銘晴雨所覆白雲之上冬愛其原厥流斯

王元坤詩百丈雙崖分巨壑泉引天紳向空落洞門長日耀珠光披拂靈風護烟幕沈沈玉竦挂飛流洞古簾

垂映月鉤鹿飲澗邊秋草動鶴鳴簾外水雲浮水淨山空深洞杳影共銀河墮林杪忽驚洞裏玉如還波紋不

捲東峯曉

蕭協中詩尋真欲問碧雲宮竹杖芒鞋好御風洞裏有仙疑睡穩故將珠水挂簾櫳

魏允貞詩藜杖山中破曉烟涓涓石壁挂流泉冥心會到源頭處一派銀河自九天

石經峪水岱覽云出龍泉峯後上接三义溝繞峯而出西南注之

黃鍊詩衆壑應看此最深岱宗直下數千尋誰題梵字深溪裏故使溪聲作梵音

鷹石溝水出十峯嶺下圖志云以石似鷹得名水南流會石經峪

龍泉岱覽云在水簾洞南三里上有高老橋盤道所經泰山道里記云水從西北山峽經此東注中谿又南注桃源峪

中谿水又東逕黑石埠西泰山道里記云有柳條灣飲馬灣石峽灣各隨地命名漢枚乘謂泰山之雷穿石是也箭竿峪水在其東岱覽云水南流逕虎山北又東南繞明尚書蕭大亨先塋側匯爲石馬灣過岱道村呂仙橋入梳洗河

堰嶺河岱覽云源出岱東南摩天嶺屏風巖之間橫溝涌流而東導南折逕凌漢砦西河腹雙泉遞涌匯爲金牛灣東南流至鳳皇村東

青龍泉自北來會之泰安府志其地水泉甚多惟青龍泉有石刻三字可紀又西南入梳洗河

迴龍峪圖志云在屏風巖南水東南流逕筆架石岱道村

入堰嶺河

福泉泰山道里記云屏風巖前四陽菴南石竅滴水曰福泉

泉

飛鸞泉在羣玉菴前明汪子卿志云在王母池右水甚清冽流注池中

梳洗河卽王母池泰安縣志云上有梳洗樓基此河之所由名也其水爲中谿所經繞郡城東南流泰山道里記云又南過封祀壇東則河淤伏流至本頭溝復見又南入泮

河歸汶總名中谿也

蕭協中詩藥宮原不珥明璫樓廢波澄映夕陽輕抹霽烟迎岱色嫩縈河芷帶天香瑤池沁液風生暈嶽麓分泉月浸涼欲借雙成問王母恐隨時局亦新妝

東谿

東谿源出岱東南之延坡嶺

蕭協中詩閒看電畫水澄溪嶽色西傾樹影低流出前村幽賞足一灣春繞碧琉璃

懸淙泉出祝雞砦巔岱覽云旋折而下奔瀉數十丈南流

達於雙溝

于慎行石淙大書歌君不見岱色參天杳何始連綿迤邐中天起觸石興雲膚寸合倏忽入壑澗烟水海若鞭石西向縈印浮水面如掌平三畝盤塘通一綫渠上原非鑿削成近接龍祠白楊浦遠渡人家清水城中有山人結廬處泉開石竇流雲注赤脚踏石頭冠雲獨釣清流砥柱短衣長鏟劇黃精山可茹兮水可烹泉石真賞琴書癖邱壑奇觀鷗鷺盟明公意槩天下奇清畫簾垂牒詠稀賞音久著調琴譜淬鏗新得試劍坻振纓獨訪巖穴閱一見磐淙輒有意淋漓揮墨入平雲靜掃秋烟立寒翠鐵勁銀曲在筆帶柱立山橫一運肘蒼松怪石墜懸崖顏柳曹米皆袖手石骨迸徹山靈嘯共引流觴石上笑泉聲琴聲相和鳴流水白雪誰比調明公返棹畱奇迹渺渺飛鳧落雙鳥山人寂寥考槃窳天籟亭中理妙籍采采秀兮盤之間石肝肝兮水瀼瀼望卿雲於天外絢五色之相鮮濯清流以自潔撫孤嶼而盤桓夫安得從美人于天路灑濡澤於毫端

雙溝挾嶺北諸谷水夾石練陀南流匯於東谿述記云又

東南流注於艾峪又東南注栗子峪又南流逕小津口東

西兩椒山夾之水東南流入蠶滋峪又南至沙溝入汶

李家泉出岱東北觀星嶺下岱覽云水南流入栗子峪

水泉峪水岱覽云入沙溝

繡彩灣出凌漢砦東泰山道里記云水東南流經白家河

入十里河

明堂泉岱覽云艾峪水自北來匯漢明堂遺趾側故名西

折而南流其經流曰十里河

泰山紀勝以明堂名泉志其地也在謝過城左小山寬  
平方里許中有馳道疑卽明堂舊基泉一線涓涓潑折  
然動盛古之想

十里河距郡治十里南流入泮河歸汶總名東谿也岱覽云東

谿不與中谿合  
摩天嶺界之也

### 西谿

西谿源出石後山岱覽云上納龍峪之水經黃峴嶺西因

### 名黃西河

王旭西谿詩我愛西谿好披雲屢往來一川烟景合三  
面畫屏開薄俗無高隱清時有逸才近巖多隙地松竹  
更須栽

谿水西逕九女砦南又西逕三尖山南

如址谷水西南流自東北來會之泰山道里記云又南逕

丹穴嶺東又西逕鳳皇山北匯為馬蹄灣北受八里溝水

又南過竹林寺西為竹林西河南逕百丈崖注於黑龍潭

陸峻竹林西河詩暝色連芳草荆扉晚暫開夕陽林外  
盡澗水竹邊來牧豎驅羊返山僧洗鉢回吟餘幽興愜  
日暮更遲迴

泇池水出白楊洞中岱覽云西南流過凌漢峯陰匯為碧

油灣水碧於油也俗呼香油灣入西河

新泉在凌漢峯南振鐸嶺圖志云黑虎峪水南流匯為新

泉西折過子午橋西會投書澗香水峪諸水

李光地詩泰山天下望峯有號金泉觸石立成澗登封  
此告虔胡茲崇頂秀襲彼舊名鮮卓錫栖靈異拈枝灑  
灑前歲禱祈望者昔著法師賢一自上人至再聞絕響  
雨風將懼恐夷險幾瀾湍人道僧鄰俗我言師不顧蒼  
蒼南嶺下藹藹長林邊羈束每塵頓馳依在蔚莘何期



行跡柱告語新泉濺宛土印須友干霄自詠言源因斷  
復出點便石如硤多是名山秘今流法水溪勞歌吾把  
卷同調那安弦歷落長幽侶優游可忘年酌甘蒼蘇壁  
采苦白雲天何用里兒喜於焉故我全吾懷云爾已師  
意將無然井邑早  
望久清渠聊可傳

投書澗水南下東受新泉之水岱覽云又西南流入香水  
峪潘允端題碣曰宋胡安定先生投書處

泰山紀勝宋胡安定讀書泰山十年不歸得家問  
見平安二字輒投澗中古人勵志精勤堅苦如此

香水峪水泰山道里記云西南流會於西谿

青桐澗在扇子崖北泰山道里記云水東流入竹林西河

又東注西百丈崖

黑龍潭澄碧無底

東百丈崖圖志云瀑瀉若垂紳名曰天神泉下注黑龍潭

忽雷灣在其西南明汪子卿志云天將雨時行人每聞雷  
聲迅發於此

西百丈崖圖志云視東崖高倍之懸流如挂練亦曰水簾  
泉岱覽云水南下注白龍池

泰山紀勝西丈崖由會仙巷過仙人影峻若建瓴而北  
丈崖如懸修橐噴萬斛真珠望之似雙龍下飲澗水奔  
躍來

會  
孫寶侗詩龍池幽且清上潭更奇麗我來日暮時凜然  
風雨勢峽口委懸瀟蒼崖盡兩際其中為深潭尋丈難  
意計空碧象涵蕩漾清光逝流沫上增眩潛形中搖  
曳清冷綠波沈沈蜿蜒白痕細山氣藹蒼茫谷風振颼颼  
恍若神物騰猛氣難自制  
霓旌間雲車駕馭遲青帝

白龍池在招軍嶺南明汪子卿志云在傲來山陞廣數尋  
深不可測池上有龍神祠在州祀典歲旱禱之輒應

袁稔詩時萬歷七年七月不雨予憂之祈雨於潭次日  
雨三日後又大雨龍之為靈昭昭也故贊以鑄石用彰  
神龍之功當永祀云白龍之潭淵莫測有禱則應  
沛降甘澤粒食生民四境既宅靈承神休永祀功德  
考古錄嶽西傲來峯下有白龍池懸崖絕壑殆非人  
境石壁平廣二十餘丈曰白龍池其旁多宋人題名  
泰山紀勝禱雨輒應歲有常饗西北諸壑之水流為漆  
河經大峪口大石峽白石燦爛沙水澄鮮石鱗魚生焉  
泰山道里記池北層崖橫互上復峭削形若舟岱史謂  
之石舟上鑄元圭石三大字下層徧刻宋人題名顧氏  
金石文字記載之未盡也池  
東有三元石前為淵濟公祠  
陳經邦詩百丈寒潭浸碧峯玉龍於此閱  
靈蹤卽今齊魯青無幾何日噓雲慰萬農  
徐欽社詩傲來東下秀且奇丹崖翠嶂色迷離况有古  
澗飛流漸銀河倒落濺珠璣聲響如雷影崩欵下而匯  
作白龍池白龍池為誰名之遙指前村黃髮知白龍曾  
化白衣兒坦腹東牀騁異姿旱魃為虐民苦饑潤澤  
民神所司我來遊此喜如痴欲拜龍神獻一卮何事  
在深潭為深潭變動不敢窺忽而澄澈照鬚眉  
浪起如堆若愛客來言在茲作霖作雨世所期  
或見誰能推龍乎龍乎繫我思我思雲從天上降

鑼鼓灣圖志云在白龍池南

按明汪子卿志云俗傳七月中元日有聲如鑼鼓泰  
山道里記謂水激石嵌如鑼鼓道里記之說為近

耀星灣在鑼鼓灣南圖志云又南為大峪

大峪南石峽寬隘者二曰大石峽小石峽岱覽云自黃西

河為竹林西河挾百丈崖水經黑龍潭白龍池至此為西

谿會歸處

谿水東折逕元忙兀博羅驩碑北稱漆河

按元忙兀博羅驩碑在郡治西北三里許碑額篆曰大  
元太師泰安武穆王神道之碑銘姚燧撰隸書碑北一  
里有大冢俗稱土公土母府縣志並泰山道里記皆謂  
博羅驩墓考碑文云公以大德庚子五月二十有二日  
薨於臨安寓舍以其年七月八日葬檀州西北太行山  
此地安得有墓少詹事嘉定錢大昕云按忙兀氏分地  
在泰安故立碑於此以紀勳德碑銘云嗟公王孫國泰  
山下正指分地而言非有遷葬之事又錢少詹札云承

詢及博羅驩神道碑事古人立碑神道本以表墓而名  
後來立碑則有不必拘者寒家所藏南宋石刻有曾文  
節公三聘神道碑在廣西省城之龍隱巖三聘墓本在  
江西其子宏正任廣西轉運判官時鑿之崖石三聘嘗  
除廣西提刑未赴任亦不聞有立祠粵西事度宋元以  
後似此者必多不獨泰安武穆一人也元時諸王功臣  
有分地者不過收其戶稅初未嘗就封於此  
史亦未見有立寢廟之證或說誠未足據也

豐都峪在垂刀山西泰山道里記云水南流逕金山北又  
西南入漆河

漆河水折而南流岱覽云東受廣生泉之水泉出廣生殿  
側故名繞府城西南逕古汶陽橋南下逕天書觀南至靈  
芝街西南為漆河橋有靈派侯廟

漆河引城濠水西受金星泉水逕橋下南流入泮  
總名西谿也明汪子卿志云三溪相去各  
十里而西溪之景為最勝

蕭協中漆河詩溪水南流駛晴烟水面浮逗巖深浴  
瀆脈遠通舟古渡蘋花冷橫津蔓草幽翛然歸汶上此  
去總悠悠

### 岱麓諸泉

白鶴泉出一天門下一里水西南流明汪子卿志云在嶽  
之南麓升元觀後冽而甘美好事者嘗以城中井泉稱較  
之輕重亦異泰山小史云宋剡郡城疏泉滌繞其下城北  
舊有水道經岱廟東南流折而西南曰運舟街至城西南  
出會漆河入泮河歸汶

泰山道里記明嘉靖間舉人封尚章別墅於泉側引水  
為池曰封家池凡輪軒譙集多於此尚章沒其家苦於  
供應遂用巨釜塞之復立閣於上自泉塞後宋燾以州  
中科目漸稀與當事議濬竟為泉所阻然至今夏秋大  
雨時閣旁地中猶隱隱如雷吼西南  
有泉一泓清冽甘美蓋其支流耳

劉汝飛白鶴泉感懷詩泰山多名泉白鶴居其首空明  
一鏡開遇物鑒好醜匯為封家池名勝由來久余祖昔  
過此雅愛泉清瀏吳君亦多情選勝招好友酒闌賦新  
詩此會良非偶閱今百餘年勝地竟何有美哉誠難恃  
伊誰職其咎人事有興廢物理寧獨否所貴蘊  
藉人於此能辨取泉尚有竭時山乃常不朽

眼光泉泰山道里記云在金山西眼光殿西遊人於此掬  
水洗目

滌塵泉述記云在后土殿門外

下泉一名罇泉泰山道里記云其水自傲來山西飛瀑而

下中有石鼓東南流入泮河

醴泉岱覽云在天書觀大門內

文獻通考大中祥符元年四月丁巳兗州乾封縣民王  
用田中有兒童培土得小青錢數十爭取之錢墜石罅  
因發石有湧泉二十四眼味極甘美又枯石河復有湧  
泉二十五眼又一眼出層阜之上信宿勢加倍又別引

數派雙魚躍其中有果實流出似李而小味甚甘及今  
古錢百餘封禪經度制置使王欽若貯水馳驛以獻分  
賜近臣詔設欄格謹護之

六月詔建亭以靈液為額  
法苑珠林泰山之東有醴泉焉其形如井本體皆石欲  
取飲者皆洗心跪而挹之則泉出如流若或汚慢則泉  
縮焉蓋有神

明以宰之也  
泰山道里記天書觀大門內舊有泉有亭明人題刻醴  
泉二字宋熹曰余童穉時猶見觀內泉出石崖下注有  
垂楊數株大二十圍蓋宋祥符時所植今  
樹既烏有而泉又鑿深為池非其舊矣

桃花峪水

桃花峪水源出西天門下上桃峪

沐龜溝水泰山道里記云西北流經李子溝至老虎窩入  
之

自桃峪之北而起者其水過頭陀巖南折而西北注混元

池

又西北逕鴈窩崖西又西北漚龍灣水

又西北逕黃石崖南又折而北三里西北流香泉水南流注之又西北逕鬪虎溝

又西北逕青天嶺長城嶺之間泰山道里記云兩嶺夾澗一源兩分即水經注分水谿也一東南流一西北流西北流者出青天嶺西南至泰安長清兩縣界首村過濬川橋折而西北其經流曰中川循長城鋪達於崗山左納靈巖諸谷水而注東南流者繞青天嶺東麓南折左會虎溝水過海眼桃花峪再折而轉東南其經流曰北汶與中川分流各半故又名泮河或謂從桃花峪分流非矣

又西南逕河上林又西南曲中有石窟深不可測曰海眼白草峪水自西注之

又南匯龜灣達於小海眼

又南逕中軍坪南注大小養魚池池南即桃花峪水會歸處又西南出峪口再折而東為泮河自分水谿至此傾曲凡八十餘里總名泮河上納三溪之水合於大汶岱覽云其由頭陀巖迤西而北而西南至襁負山皆桃峪右岸由十字峯西北而南左接傲來西界肥邑則其左岸矣

蕭協中泮河詩泮溪春水綠于苔曾向漁郎渡口來水面桃花紅片片令人翹首憶天台

自桃峪之南而起者混元池下三汊澗自西來入之峪水又西北大倒溝水自西來注之

又西北有小倒溝水自西來注之溝西南為梯子山有石  
厂溝又西南至水闢石屋又南為水鈴山東面有烏龍潭  
西為壇子澗

枯石河水出迎風嶺下東流逕烏龍潭

石屏峪水西南流過黃金口入之石屏峪水不與竹林西  
河合壺瓶片界之也

又南折過大埠嶺東入泮河

臍子溝在海棠峪西南

蓑草泉在駱駝嶺藏峯寺東岱覽云水南流入泮河稍谷

其西澗也

甘露泉出三綰山水東流入泮河

沈泉出黃山

九龍峪諸水

九龍峪在岱頂東神霄山下岱覽云納諸巖澗水東南流

北折繞神霄東滙雲河水雲河者水滌  
漾如雲也東北注鷹愁澗泰山

道里記曰北有洞曰清靜石屋中有清泉

鷹愁澗在東天門東伏虎門下圖志云峽口陡險深不可

測水東北流會洗鶴灣

亂石溝岱覽云在岱陰八仙洞下水南流過避塵橋東折

逕鶴山北又東滙為洗鶴灣

洗鶴灣泰山道里記云夾岸陡險蒼松欹臥如梁水滌洄

而東注達於谿里峪

靈異泉在天空山前黃華洞中岱覽名來鶴泉

石乳泉在蓮花洞內

泰山紀勝石屋與八仙洞相連然無徑可通澗石如疊  
卵攀藤附葛而下行五六里始達雲路透折緣山跨澗  
嵐氣與松風相激薄沾染襟袖眉宇為之浸綠既至峭  
壁圍空率千百仞皆神工削成展若列屏曲若卷蠶松  
生巖阿間撐雲蔽日上不見天澗下松棚如積霧蔀屋  
亦不見地轉側入黃華蓮花二洞掬泉水飲之覺惠泉  
中冷猶是人間褻味也此為岱陰第一  
一洞天福地徘徊彌日喟然觀止

鑑池在天空山東九龍岡上泰山道里記云清可鑑髮俗  
呼玉女洗頭盆岱覽云東下為旋螺峪北為鳳凰池東北  
為飲虎池皆以水勝

小冰牢峪岱覽云在孤山東北五里即岱史天牢峪也泰  
山道里記云陰壑層冰經夏始解因名凌冰洞圖志云或  
呼老冰洞水東北流入天井灣

大冰牢峪泰山道里記云在眺平臺西北六里石凹極闊  
又曰冰穿岱覽云視凌冰洞尤危險水東北流會冰洞入  
天井灣

谿里峪圖志云在天燭山下巖穴深窳泉湧不竭岱覽云  
鷹愁澗洗鶴灣之所匯也又名風魔谿東南流入掃帚峪  
天燭山東為分水嶺泰山道里記云其南則有掃帚峪李  
家泉諸水其北則有旋螺峪冰牢峪諸水皆循嶺分流焉  
又東逕嶠碌峪大津口北為天津河石汶源也泰安縣志云環  
周明堂故趾而東流

天津河

鴈嶺河出蓮花峯恩谷嶺之間岱覽云兩山中峽水東流

匯爲天井灣卽天津河源也

佛峪水在其北泰山道里記云東流與馬跑泉會其上有

玉泉禪寺

玉泉在寺東泰山道里記云古井水色紫黑充盈遇旱不  
滅党懷英八分書玉泉二大字

又北爲青岡峪水圖志云東南流與佛峪水會入天井灣  
馬跑泉一名莎草泉泰山道里記云出仙臺嶺之陽水南  
流逕牛欄口西圖志云又南逕竹園東入天津河

天津河水又東逕青山北距大津口五里曰麻搭河岱覽云又東

流左納龍門溝水又東南流四里出升仙嶺東南爲石汶  
所匯

津拱河出仙源嶺鹿町山之間劉氏類山云陡岸深凹晉  
張忠所鑿石釜也岱覽云東北流左會巖洸河又東而  
南入石汶

巖洸河泰安縣志云源出摘星巖青陽谷南流逕上下兩  
港村又西南橫介大小兩廬山之中岱覽云西南流入津  
拱河歸石汶

狼虎谷水岱覽云南流入石汶

金井河源出九坂嶺岱覽云下爲九曲峪水西流過雨砧  
崖淥池南折至九頂山後又東匯爲金井灣繞山東南折  
而西南流逕汶里村東入石汶

泰山道里記金井河西涘曰西金井入或  
淘金於此以東金井在河東涘萊蕪境也



徂徠諸水

羊公河泰安縣志云源出徂徠山陽澹崖下南流過三嶺  
崗東又東南逕時家莊東又南至羊祜城西因以名河又  
南入小汶

自來泉泰山道里記云徂徠絕巔西有紫霞洞下爲李源  
砦自來泉飛流圖志云其水西南流入響水河

響水河泰山道里記云出徂徠西南乳山之北上納諸谷  
水匯此西導曰日新池達於毛老谷過茅茨村南又西入  
大汶

漿池岱覽云爲八道溝石溜峪水所匯南流會響水河  
滄浪溝岱覽云納上峪之水又西南入大汶

白蓮泉岱覽云發源於他山水西南流逕積穀山南其經  
流曰順河入大汶

礫石峪飛瀑水泰山道里記云至隱仙觀南與西澗合流  
繞天半砦又西南注羊公河

西別谷水泰安縣志云在貴人峯東水東南流

東別谷水岱覽云出演馬嶺西南流五里與西別谷合流  
南注小汶

藍谿水出薤山泰山道里記云東南流過鎮里村西又南  
入小汶

紫濼池岱覽云在徂徠巔東北五里一名紫源池產九節  
菖蒲及玲瓏草木沙溝河源也東北流經天平後砦東至

沙溝河北折過西莊又西北入大汶

鷓鴣泉泰山道里記云中軍嶂西為招軍石旁有鷓鴣泉下為大峪水西流入鴈愁澗

龍谿在太平後砦東泰山道里記云水東北流過燕子石屋側危崖瀑流而下曰濯龍灣以崖上凸起三畫宛若游龍故云北導西折曰四里河繞徂徠北麓又西南入於大

汶

鴈愁澗岱覽云在大砦口迤東泰山道里記云水北流經石匣溝匯為白鶴灣又東北會四里河

曲水河泰安縣志云源出徂徠西北攢石崗之竹谿水西北流逕竹谿菴南又西北過轉山下入大汶

吳山溝水泰山道里記云西南流入大汶

東會河泰安縣志云源出徂徠東北諸谷中下會北滾順河諸泉西北入大汶

徂陽河泰安縣志云在徂徠天平前砦下源出堯山之北納諸谷水屈從南流至此又南過天寶寨東又南逕古南城東入小汶

東澗河泰安縣志云一名溜水出徂徠東南泉里莊石罅中會針溝泉諸水西北入小汶齊乘云泰山南亦有溜水即此水經注以小汶為溜水亦以此

汶水

汶水按水經注有牟汶北汶石汶柴汶元和郡縣志云汶

水源出乾封縣東北原山西南流經縣理南去縣三里又有北汶羸汶柴汶牟汶浯汶述征記曰泰山郡水皆名曰汶有北汶羸汶牟汶柴汶與水經注之石汶世稱五汶皆源別而流同也禹貢錐指云汶水有五北汶羸汶柴汶牟汶其一則經流也書經地理今釋云汶水合流於泰安之靜安鎮謂之大汶

大汶發源於萊蕪縣原山之陽水經注引從征記曰汶水出縣西南流自入萊蕪谷夾路連山百數里泰安縣志云此經流源也較諸汶爲獨遠水西流入泰安境過梭村北逕臺頭史家莊至谷家莊折而南逕北禪村西汶曲中至故縣東又西南流有合石汶

石汶泰安縣志云出泰山東北天井灣上接仙臺嶺下之沂河諸谷東南流繞周明堂側曰天津河東過青山北曰麻搭河有津拱河西南流注之又南介祝陽村山口集間巖洸河西南流注之東南至南北兩石汶村又南逕故縣西至岔河入大汶范家灣鯉魚溝諸泉西南流注之泰山道里記云自天井灣至此逶折九十餘里左受萊蕪原山之水過古博邑城北合爲塹汶西南流有塹汶河村碣曰古靜封鎮左與萊蕪之牟羸二汶會

牟汶有二泰安府志云一自萊蕪縣東南寨子村海眼泉發源合湖眼蓮花等泉西流逕顏莊至盤龍莊一出萊蕪縣東二十里古牟城西南水經注云汶出牟縣故城西南

阜下俗謂是水爲牟汶也萊蕪志云自響水灣發源會鵬山趙家諸泉西南流至盤龍莊二水合流又西有孝義河水入之又西至瀘馬河合於羸汶

羸汶亦有二泰安府志云一自萊蕪縣南宮山之陰石漏河發源北流逕安仙寺至瀘馬河會牟汶又西逕縣城南坡草窪至嘶馬河一自萊蕪縣東北大龍灣發源西流合西北諸泉南流入嘶馬河泰安縣志云至是匯四汶挾諸泉西流入泰安境至嶠峪北嶽錫靈泉自東南注之東會河挾順河北滾諸泉自西南注之

板橋灣泉自北來四至沙際伏流地中

十餘里逕焦家林南至塹汶河村入大汶又西南合流逕崔家莊北徂徠東西兩桃河自南而西注之又南逕遂家莊又西南逕顏家村清泉鐵佛堂等泉自北注之又西南逕博縣故城南右合北汶

北汶卽泮河自泰山西北分水谿分流至桃花峪水經注云北汶水出分水谿源與中川分禹貢錐指云北汶卽泮水源出泰山分水嶺非萊蕪志所云北汶也泰安縣志云出桃花峪口東南流逕新莊東北火樓莊粥店至高里山南又逕舊鎮南又東至城南西谿濼河南流注之又東至城東中谿環水西南流注之又東南至夏村南東谿諸水亦西南注之又東南逕全標店東入大汶又西南合流東逕南北望村徂徠西麓諸泉注之又南抵陽關城西水經注云汶水又西南逕陽關故城西是也右合柴汶

柴汶即小汶水經注云汶水又南左會淄水水出泰山梁父縣東南流逕柴縣故城北世謂之柴汶矣泰安縣志云柴汶發源於新泰縣龍堂山至安家莊入泰安境西南逕古岱山城左受濁河諸泉又西逕羊祜城南柴城西北循徂徠南麓柳谿諸水自柴城樓德間西北流注之又西南介梁父村韓家莊間逕龍鄉故城南水經注云汶水又西南逕龍鄉故城南是也入大汶西南流為大汶口大汶口五汶合流處也泰安縣志云汶水合流又西南逕汶陽城塹舍集抵高淤村南匯河諸泉南注之即西濁河十餘泉又西南過堽城壩橋石溝河即小西合諸泉南流注之又西逕張侯樂任南會肥城之沙河至道溝入東平州

境西逕坎河之戴村壩北與清河會濟汶合流實汶水之故道也其經流屈而西南至汶上縣南旺湖分流入運河

按禹貢錐指有水出萊蕪縣寨子村流合牟汶者近志指為浯汶據漢志瑯琊靈門縣有高萊山浯水所出東北入濰許氏說文水出靈門山世謂之浯汶在今莒州界與萊蕪無涉志妄言耳浯汶遠在瑯琊關入泰山郡城近志因之而誤故正之

宋文天祥汶陽路遇雨詩積雨不肯霽行路如涉川青羶繚我後白羶覆我前我欲正衣冠兩手如糾纏飛沫流被面代我泣涕漣鴻雁分南翔遊子入北燕平楚渺四極雪風迷遠天昔聞濟上軍又說汶陽田我今履其地弔古蒼蒼烟男兒欲了事長虹射寒泉

又過汶河中原方萬里明日是重陽桑棗人家近蓬蒿客路長引弓虛射雁失馬為尋獐見說今年旱青青麥秧

明喬宇大汶口九峯南望碧巖峩汶水平添一丈波渡口客來休便過北溪山雨正滂沱

戴經汝河古渡五汶滌泗一脈深巡崖轉壑下千尋飛  
流畫錦波光動界道長虹草色侵曲水亭邊雲漠漠文  
姜臺畔雨冥冥渡頭憑弔  
當年事却羨漁舟傍綠溇

國朝高珩曉渡汝河神祠小憩白髮抽簪起每遲宵征又  
喜見朝曦葑田水路通樵徑野墅雲深失酒旗細雨黃

墟三日醉微風青柳萬條絲神祠  
回首人惆悵四十年前駐馬時

程雲過汝水有感二十一年入汝流清波西去日悠悠  
平沙曲岸參差出黃葉青苔次第浮客路斷橋前夜雨

人家返照舊時秋祇今風景  
看無異江北江南迥自愁

張元大汶口晚抵大汶口停鞭愁獨看危橋通斷岸怪  
石插驚湍漠漠平沙遠荒荒落日寒浦風捲落葉隨地

撲征  
鞍

王革大汶口沙岸行人少長橋斷壑東一行寒鷺白半  
嶺夕陽紅負米年華裏為儒道路中那能驅款段臨水

已成  
翁

泰境諸泉

泰安縣治泉源共六十有七泰安縣志曰坡里泉雲臺泉

皂泥潭泉鳳凰泉清泉利運泉廣濟泉鐵佛堂泉周家灣

泉風雨泉馬兒溝泉泰應泉以上十二泉在縣東明堂泉

梁子溝泉木頭溝泉以上三泉由縣東南廣生泉金星泉

張家泉龍灣泉以上四泉至全標梁家泉獨東南流上泉

靈應泉馬蹄泉臭泉湖港溝泉狗跑泉報恩泉陷灣泉水

磨泉新泉以上十泉由匯河至西馬黃溝泉南迤三汊口

龍王泉坤溫泉涼泉以上三泉由小會大興橋泉鯉魚溝

泉范家灣泉板橋灣泉北滾泉搬倒井泉會泉順河泉以上

八泉在縣東大汶嶽錫靈泉北流入吳山溝泉滄浪溝泉

之東南入大汶

以上二泉出徠西麓入大汶斜溝泉水泉羊舍泉新興泉白土崖泉龍

堂泉鄉城泉以上七泉在小汶之北濁河泉鬪泉針溝泉

力溝泉二柳泉黑虎泉神泉海潤泉海旺泉小柳泉石縫

泉水泊泉皮狐泉韓家莊泉梁父泉以上十五泉在小汶之南入小汶

靈巖諸水

甘露泉岱覽云出絕景亭東崖陞泰山道里記云水西流

繞甘露亭北又西過玉河橋下復北折入

御花園匯魚池伏行而南

明劉亮采詩甘露泉頭石偏宜月上憑雲歸山一色葉落澗多層幽壑棲靈物長林散佛燈吾生有結習每欲

僧作詩

石龜泉岱覽云舊在

行大門內迤西涸

印池泰山道里記云水出函雲洞繞鐵袈裟亭而西注又

北伏行會彩泉

彩泉岱覽云北谿源也舊有接引佛殿圮泉在殿陞東水

西流逕三空橋注飲馬溝

北谿泰山道里記云即飲馬溝靈巖志稱宋真宗幸靈巖

曾此飲馬得名有新石橋明天啓中釋圓桂建東納彩泉

諸水經三空橋下則淤阻伏流至此復見屈曲西南黃龍

泉水自南來入之又西過雨花巖大小橫溝之水雙抵谷

間流各從北來入之其下曰滌思峪又西與南谿交流匯

為大谿又西石隴泉水自南來入之又西北注於沙河即

水經所謂中川也又西北過長清城東北歸大清河

雨花巖岱覽云泉激灑如雨下匯飲馬溝

予紹舜詩懸崖滴滴絕喧塵杖履何辭遠問津石竇飛泉寒漱玉谿花落水淡含春斜攀曲逕松為蓋倦枕清流草作茵自是桃源仙隱地可憐身世日因循

卓錫泉岱覽云在五花閣東北蒼崖之陽一名錫杖泉西流三四步匯為鏡池亦曰功德池舊有龍王廟今改卓錫

亭

泰山紀勝佛堂中鑿池得源砌以文石一泓淵瑩中懸琉璃燈映之洞見九淵掬飲肌骨皆冷心塵頓淨亭前引為曲水分注時有松蕊流出見者疑是武陵桃花

采蔡安持錫杖泉詩畏途暑溽汗揮流暫記靈巖物外遊山遶禪肩泉漱玉新秋氣候似窮秋

雙鶴泉岱覽云在卓錫泉迤東北峪泰山道里記云在慧崇塔西北里許水南流經前元

洞園光洞東而注大橫溝源也

飲虎池岱覽云在拂日巖北泰山道里記云水西北流中

匯方泉東崖有老佛窩池水又西逕積翠巖南又西南流

小橫溝源也

神寶泉岱覽云北峪之北有石厂泉在石厂西北二里山

石間近小寺莊下為漬米峪言水僅可澌也北流西折注

中川

華巖泉泰山道里記云在靈關峯東二里水北流入黃家

峪西折注於中川

醴泌泉出黃尖山之陽

朗公泉岱覽云出朗公山南九曲峪水北流東折南下三



里注靈帶河

堃溝岱覽云珠山有堃溝會納支水南谿源也臥象嶺澗水注之

南谿岱覽云水循黃茆岡東導折而南會憩象泉而西注至滌思峪西南會北谿諸水為大谿

蘆溝水東西磨山夾之泰山道里記云東流南折會棋子嶺西曲溝水曰三义溝又西至武家村南北接靈帶河水南接紅蒿峪水匯為合一河又西過長城鋪北注於中川

珉瑞諸水

龍洞泉岱覽云在神通寺東泰山道里記云洞門半掩石龍半露水自中出經青龍岡通聖橋西注玉水

染池在神通寺東

明晏壁染池詩柳子當年記染溪別分一派出東齊憶從濯錦江邊過風漾晴瀾五色迷

海螺峪泰山道里記云在青龍岡東三里匯錫杖泉西南注於玉水

玉水源出梯子山西仙龍潭水經注云濟水又東北右會玉水水導源泰山朗公谷舊名珉瑞溪水亦謂之珉瑞水也其水西北流逕玉符山又曰玉水泰山道里記曰珉瑞東南三十里為泰山西北之長城嶺嶺南北水皆分流迤北為梯子山谷水更多東有雲梯澗西為仙龍潭歷城志稱錦陽川納諸水逶迤西北流左會礦洞溝水又西北經桃科嶺東左會枯泉之水又西北逕平頭山東又西北左

會龍門峪水又西北逕齊王砦南又西逕琨瑞山南曰琨瑞谿

獨孤泉泰山道里記云梯子山西為天麻峯獨孤泉北流龍池泰山道里記云又西為松峯下有龍池亦玉水發源處水西北流經窩鋪峪又北過雙鎖山紅山口西右會三岔水又西過金驢山南又北與琨瑞谿合流總名玉水也又左會涌泉之水有涌泉橋

玉水又西逕屏風山南又西逕柳埠村南

雲谷岱覽云在交戰峯西下有響泉又西北有苦苣泉有琴泉齊乘謂泉甲天下韻琴筑而味肪醴是也

雲谷諸水西北流逕靈鷲山西會聖水泉又北逕回龍山西入於玉水

冰泉岱覽云在長城嶺北鞦韆臺下北經龍峽入印度泉茶臼河出齊城峪泰山道里記云中有試茶泉懸流飛瀉經康泉右會勺泉峪水又北過白石崖西左會避暑泉水又東北逕虎頭崖西右會段華泉水入於玉水瓦子溝西為黎峪有潮音洞上接印度泉水經閻家河北流右會石灰溝水又東北右會礫池水又北經三角洞東又北右會石厂谷水又北經青岡嶺東入於玉水玉水又西逕柏崖下為柏水灣又西左會石欄峪水又西經扶山北伏流有熨斗泉東北流北六里為都泉都泉為岱北諸泉之總水西注會水簾泉

玉水又西北經總度口南接錦雲川合流

南川一名錦雲川泰山道里記云發源於玉皇嶺之蔚溝

西南為拔山為五女石山溝水西北流經東南棋子二嶺

中峽會西棋子嶺水曰出山溝又名出泉溝達於黑山砦

北有下安寺故址屈從東北流左會百花泉水又北左會

雙泉水又西北經楊廣砦東又西為火焰山為天麻砦中

夾道溝峪

玉水又西逕康王山南為黑水灣

玉水又西逕中宮鎮南齊乘稱中宮東有懸泉柳泉車泉

皆入玉水北接錦繡川合流

晏璧柳泉詩杏花开徧柳垂絲柳下清泉漾  
碧漪莫折柔條畱繫馬綠陰深處聽黃鸝

又懸泉詩百尺深泉石上懸龍歸洞口散  
晴烟曾從五老觀飛瀑倒挽銀河落九天

北川一名錦繡川泰山道里記云發源於梯子山雲梯澗

西北流左會紅泉峪水又北右會石隄谷水又東北左會

燕脂泉水又東北右會藕池水又北經黃蘆泉禽寇峪會

雲河水又北經黃砦南右會天井峪水又西為大澗嶺有

龍灣水西南流又西經桃花嶺南有桃源洞右會大黑谷

水又北經青石崖東又北左會白雲泉水又西經林泉觀

南又西經琨瑞山北左會荻子峪水又西左會馬蹄谷水

又西北經香孤山南又西經大佛寺會竇姑泉水又西南

左會稻池水入於玉水

歷城志錦繡川延袤六十餘里泉石之勝層  
現疊出劉天民函山集強半詠北川風物也

玉水又西北經月牙嶺北又西北逕罈口嶺北又西北逕  
臥虎山南岱北諸水之水始合於此又西北逕黃山北又  
西北至渴馬崖南則泊然而止泝流而東為突泉又北  
曰灤水又東曰小清然西北流者至長清縣之嶽山北復  
見又西北逕獵山北又西北經齊河縣界入大清河水經  
謂之濟水會歸矣

泰山志卷第九

泰山志卷第十

朝議大夫山東泰安府知府休寧朱纂輯

祠廟志

岱廟在泰安府城內西北隅水經注引從征記泰山有下  
中上三廟齋闕嚴整門閣三重樓榭四所按此則下廟也

風俗通岱宗廟在博縣西

北三十里山虞長守之

燕魏雜記東岳廟在兗州

府奉符縣封天齊仁聖帝

明汪子卿志案志唐廟在嶽之南麓岱岳升元二觀前

當為漢阼宋改今地其後廢興修葺詳具宋祥符宣和

金大定元泰定至

元及明朝諸說石

舊州志廟創始於唐恢

拓於宋重修於金元明

遙參亭在廟前昔凡有事於廟者先拜於亭而後入故名

遙參前有石坊坊北為殿祀碧霞元君兩廡翼之其後為

東嶽坊以上圖志

明汪子卿志遙參亭舊榜曰草參門中有臺臺再成臺上有亭亭重簷四面十有六角峻嶒綺麗泰山道里記遙參亭一名草參為入廟之始自明人設元君像於亭中遂與廟隔不可通輦路矣

東嶽坊北為廟城周三里高三丈有奇門凡八南關者五中為正陽左右為掖門掖門左為仰高右為見大東關者一曰青陽又曰東華西關者一曰素景又曰西華北關者一曰魯瞻又曰厚載門各有樓城四隅亦皆有樓曰翼曰良曰乾曰坤各隨其方以名之由中門而人北為配天門其東為三靈侯殿東南有宋宣和宇文粹中撰修廟碑最鉅東為炳靈殿殿後有靈感亭殿前有古柏六株傳為漢

武時植有

御製漢柏圖碑

文獻通考炳靈公廟在泰山山下後唐長興三年詔以泰山三郎為威雄將軍大中祥符元年十月封禪畢親幸加封令兗州增葺祠宇經度制置使王欽若自言嘗夢覩神又於廟北孺建亭名曰靈感焉時可記炳靈殿前漢柏十餘株皆連理中一株最巨輪囷擁腫狀尤詭異非百年不能有者陳昌言漢柏贊有苑者柏蟠株靈字植之何年云自漢武形寄青巒巍峙崇階兄彼秦松弟迺唐槐飛潤流津函雲滿月喬柯孤引修幹高揭亭亭偃蓋蔽芾侯甸鎮厥東土蔭蒞下民我來其下徘徊徙倚圖以攜之斯夕止仰

王憚漢柏詩蒼柏無城廡漢陵闕宮遺樹鬱岬嶭崔嵬不植明堂礎造化潛通嶽頂靈萬壑烟霏封傑幹半空風雨撼秋聲白頭曾見東封日秀映鸞旗一色青王奕漢柏詩膚剝心枯歲月深孫枝已解作龍吟烈風吹起孤高韻猶作峯頭梁甫音

李興祖詩瞻彼長林其實森森冲霄漢兮慰我好音  
瞻彼長林其質彬彬獨凌寒兮慰我同心 瞻彼長林  
其葉葱蔥億萬斯年兮用示稟歲終

施閭章詩根不必踞絕壁枝不必摩蒼天婆娑嶽廟眼  
前樹輪囷屈曲幾千年龍文蛇腹復猿背鐵幹蟠空少  
根蒂岱宗玉女旌旗翻百靈半夜風雨會草偃畢宏畫  
不得神物旁觀空歎息春暮天寒鶴鶴悲陰霞繞樹沈  
雲黑雀鬼祠廟已頻災唐槐灰燼秦松摧武皇六龍逝  
不回嗟爾古柏胡為乎在哉令我哀歌矯首心徘徊

炳靈殿北舊為迎賓館為候王人之所康熙間增置三茅  
殿乾隆三十五年拓建

駐蹕亭改三茅於延禧殿

配天門西為太尉殿朱佐前定錄補謂為齒公杜琮也西  
南有宋祥符晁迥撰加封碑視宣和製稍亞焉又西由延  
禧門入為延禧殿前有古槐明甘一驥題曰唐槐也

馮時可記唐槐一株中空而  
半枯其半枝葉蔽芾如新植

李興祖唐槐詩爰有綠槐在岱之陽云誰之澤庶士伊  
人彼伊人兮實獲我心 爰有綠槐在岱之下自居月  
諸曷維其久我有旨酒以飲以遊 爰有綠槐在  
岱之西黃鳥于飛既奮且翬悠悠我思薄言旋歸  
張鵬翻唐槐詩瀟灑名山日正長烟霞為侶  
足尚祥誰能欹枕清風夜一任槐花滿地香  
嚴長明詩二首盤拳雙幹入晴烟幾見風花殿角前不  
奈更詢唐代事斷碑已失鼠兒年 亂蕊珍珍墮瓦溝  
黃時想見不宜秋繁華久絕  
南柯夢想祇有仙鄉欲臥遊

延禧殿北舊有御香亭為收貯御香之所有誠明堂為祭  
官齋宿所竝圯又北為藏經堂內貯歷代經文典詰東為  
魯班殿西北為環詠亭四垣嵌歷代石刻明萬歷間重建  
乾隆十二年拓新之中勒

御製環詠亭詩

文翔鳳記延禧殿西偏有環宇以鶴歷代名人之詩者為觴地  
岱史亭久廢諸石刻淪於荒穢中萬歷間桑東陽仍其舊址復構亭宇將韓范歐陽諸公題名拂拭而維新之  
嚴長明詩林屏間敞殿西偏春晝來過草色芊翠壁陰  
濃疑有雨古槐根斷忽生泉吟邊韻落掙縱鐸劫外碑  
橫片段烟到此可無題  
字在簣蓄特地揀勻圓

仁安門在配天門北內有石欄內外奇石凡九皆有題勒字多漫漶左右碑石林列西有石幢一高二丈許俗亦呼為無字碑

石欄北為露臺臺上屹然中立者曰介石俗名扶桑石有古柏一株披衷北向曰孤忠柏東西有碑樓二東為

**御製重修岱廟碑西則明太祖制改泰山封號碑也**

臺下有古檜數十株蟠結杈枒臺西一株附枝倒垂如綴

臺東西有井二西井味尤甘美又有鐵桶一宋建中靖國元年造奉符縣人李諒題記

上為峻極殿明汪子卿志曰仁安殿朱孝純圖志並泰山道里記云即宋之天貺殿

汪子卿志云天貺殿在嶽頂宋真宗得天書建學士楊億撰碑銘殿今廢

碑存嶽祠殿九間重簷八角覆以黃瓦如王者居內祀東嶽泰山之神

吳雲題聯帝出乎震人生於寅

國朝康熙二十三年

賜額曰配天作鎮雍正九年

賜額曰岱封錫福乾隆十三年

賜額曰大德曰生聯曰青社開封峙者宗山稱嶽長蒼精降德

聖惟產物與天齊三十六年

賜玉圭一高三尺五寸寬八寸色白微青上鐫乾隆年製四字

周以長廊壁繪冥司審錄善惡狀東廊之中為鼓樓樓後有東齋房圯西廊之中為鐘樓樓後有神器庫庫北為西齋房圯圯殿後為寢宮東西日配寢乾隆十三年

賜額曰權輿造化聯曰震出泰亨萬物廣生推盛德雲蒸雨降

八方甘澤遍崇朝以上朱孝純圖志參用泰山道里記

水經注引從征記云廟中有漢時故樂器及神車木偶皆靡極巧麗又有石勒建武十三年永貴侯張余上余馬一匹高二尺餘形制甚精今亡案建武是石虎年號注誤作石勒宋楊億天貺殿碑銘宇文粹中重修泰嶽碑記金楊伯仁重修東嶽廟碑文俱入金石記明薛瑄重修碑記東嶽泰山之神故有廟在泰山之陽朝廷有大典禮大政務則遣使告焉廟屋既久多圯

弗治先是守臣嘗奏請修建而未克底完天順已時  
安州復以其事達之濟南府因以上請詔允修其於  
廟志乃泊巡按藩臬協議既擇有幹幕職以董其役復  
修葺南府知府陳銓月一征以綜理焉銓始至泰安謂  
財重民力為本財匱民勞事亦非可因詢及守廟者具  
言數十年所積禮神之物甚富遂遣人持市木之巨細  
與其他修屋之不可缺者及既合而匠役皆在官之人  
而農氓不知有役銓既綜理有法董役者亦用其意不  
急不徐工日就緒始事於天順庚辰秋七月辛巳夏五  
月訖工殿宇周廊門觀繚垣悉皆完治不隔於前不侈  
於後咸願刻石以紀其事山西按察使王允濟南人也  
因以書來求文於瑄惟孔子有曰必也祀之名乎蓋明則  
有禮樂幽則有鬼神其理一也然則祀之名乎蓋明則  
以正名為先乎如嶽鎮海瀆在古帝王之世皆以名山  
川稱之無封號之加蓋以其為天地之靈秀神氣  
流通能興雲雨以澤物能出財物以濟民雖載在祀  
典而不可加封號自前季以來道學不興雖載在祀  
而不明于天下邪誕詭妄之說日作於是五嶽為王  
為帝者有封五嶽為公者有說日作於是五嶽為王  
而各加以美號夫嶽鎮海瀆其形峙而流其氣神而



靈古禮五嶽視三公四瀆視諸侯而乃崇其等入其神  
名既失正神豈顧享洪惟我太祖高皇帝定有天下之  
初即稽古祀神之典五嶽五鎮四海四瀆皆其所以  
日考諸祀典知五嶽五鎮四海四瀆皆其所以  
名美號歷代有加瀆禮不經莫此為甚今依古定制凡  
嶽鎮海瀆並去前代所封名號止以山水本名稱其神  
仰惟詔旨所載隆復古制大洗前弊其所以達幽明之  
理言上下之分允宜表正斯垂法將來而為萬古不  
易之大典孔子所謂正名者斯見之矣其秩其祀而弗  
泰山之神為諸嶽冠聖朝既正其名秩其祀而弗治  
又俾所司以時修葺而巡撫臣等其秩其祀而弗治  
如銓者不竭民之財力而克底完新其秩其祀而弗治  
不休顯命而致謹於人神者矣遂序其事而銘之曰  
理幸幹二氣互根清淨無際湖壘斯存柔行剛時川洪  
嶽尊惟此泰山造化鍾萃龍光水虛存柔行剛時川洪  
瞻實眾嶽最其蓄罔測其施廣量元重寸石甘雨八  
功既載溲厥報宜彰有廟在陽奉命新葺重石甘雨八  
臣是職不匱勞事底完集殿宇廊觀舊重石甘雨八  
中復何前不卑神氣鬱鬱流通在茲昔古山  
體夫何前不卑神氣鬱鬱流通在茲昔古山  
道復何前不卑神氣鬱鬱流通在茲昔古山  
俗宗神稱允格迄茲有役咸願石刻述理繼

無極 國朝朱彝尊重修碑記 禮記山川之祀以望其既祭也則以  
牲玉度而縣之於林沉於水未祀以前高祀者其後易壇  
壘為廟而五嶽皆於山下恒山祠上曲陽遠在數百里  
外倘不夫古望祀之義焉東嶽廟在泰安州治西北隅  
實獨之南麓前三門三塗樓峙其前神之居在五重  
端冕秉圭一帝如帝者之儀配五色後蓋分祀五方而青  
禮有祀於岱章服之盛非僭也書歲二月東巡守至于  
岱宗爾雅釋山河東岱應劭曰岱始也宗長也萬物之  
始陰陽交代故謂五嶽之長相傳神掌死生之籍故曰  
齊度游四方名登泰山錄蓋自九皇六十四代以來秩  
祀不改彼嵩華恒霍特廟祀一方而已神祠宇徧天  
下生民之奔走威福者疑於崇標峻極是處由是山椒  
嶽頂各飾神祠金碧焜煌於松栝之表至州城之廟載  
諸祀典所報者或未之過焉祭一灑掃而已廟以是  
臣祠告外則州之有司春秋致祭有灑掃而已廟以是  
久不祠官祀抑知百神受祀於海內名山大川爰命祕書  
職必治官祀抑知百神受祀於海內名山大川爰命祕書  
踐位之六年躬覽大政告於海內名山大川爰命祕書  
院學士宛平劉公修岱宗之祀使旋尋奉

泰山志卷下

六

命撫

東土既至傲知州事林君修治於是三司以下靡不率  
錢為助采大木於江淮由運河輦於廟明年竣事城之  
雉堞殿之垣墉戶之根樞土者為臺木者為榭鼓鐘之  
樓者復立之鬼物所來檝瓶甌罍莫不畢治穹碑斷碣  
路者復立之鬼物所來檝瓶甌罍莫不畢治穹碑斷碣  
來覽觀也非子不可齊尊伏念岱宗為先王省方之地觀  
斯文也非子不可齊尊伏念岱宗為先王省方之地觀  
民設教於是乎在國有字顯若惟神是依治神人以和上  
下建神元以保邦國觀化之理一也萬物出乎震妙萬  
物者莫如神以天地之盛德仁氣備焉神之靈爽既妥百  
者不於彼而於此焉庶無戾於古矣乃作詩曰萬策之  
生孰秉其權陰陽相代有化必遷巖巖喬嶽善氣所宣  
降婁之躔天柱左海羣山是宗莫之與等惟神司職克  
配真宰陳書於虞考禮於周魯公三望紀於春秋百王  
之祀豈其崇邱嗟世之人不稽祀典鍵此重扁巒磴是  
踐神房寢地覆之苔蘇穆穆  
既親萬機使告於岱誕及海沂親臣代祀叩神之扉  
天子恩言爰撫青社小東大東綏此勞瘁有淑者旗有華者  
馬乃巡於野乃舍於郊乃諏司牧爰暨庶寮浮木於江  
斷石於於公來奉符五宿山麓新門有伉四阿重屋亦  
有寢宮陳其牲玉有蒼者璧帝時其容百靈來會爾侯

帝有

南公奕奕者廟神罔時  
柏樹以豐碑昭神之德  
山如礪報祀不忒

朝定鼎燕冀而泰嶽峙其東  
脈起長白實為左護出雲降  
雨潤四海之蒼生毓秀鍾靈黼

九重

聖相承屢奉  
勅修乾隆三十三年夏四月額駙巨福隆安奉

特命

臣劉浩前往會同撫臣詳細勘估  
與修臣劉浩星赴東  
省會同撫臣富尼漢登泰相度  
山頂碧霞宮並相近

宸章

聖上虞巡周邁二月岱宗而岱廟與廟前之遙參亭歲久悉  
盡頽形均蒙  
勅修謹勘估入奏乾隆三十四年春臣劉浩面奉  
聖綸秉虔赴泰會同撫臣富明安委員庀材鳩工擇吉興作

聖天

子崇重泰岱神祇之至意距乾隆三十五年殆幾兩載  
凡神像大殿以及各殿宇廊廡門垣全行拆倒新修次  
第具舉丹雘藻繪輪奐一新茲庚寅歲冬月之吉大工  
告成仰見廟貌巍巍聿新孔固而山頂碧霞宮諸殿亭  
祠廟

悉皆翬飛雲表迤邐於峯迴翠疊之中明歲

變格 躬親 皇恩

特舉崇祀之盛典廣為庶兆之  
將以工竣會 奏告成實屬萬世無疆之休用謹拜手  
碧霞宮等八處亦俱附著于斯云

宋歐陽修祭東嶽文修比者獲解郡章許還里開方巾  
車而即路屬暑雨之時行以愚誠仰干大造蒙神之  
惠賜以不違吹清麟而散陰暴秋陽以潤輟遂無道路  
之阻得返草茅之居荷德之深不知為報一觴之潔謹  
用薦

宋濟南守曾鞏告岱嶽祈雨文去歲之早有請于神  
畀嘉澤田則大稔今春河役發民二萬更迭齎送輒又  
倍之蓋此齊人出者幾半迨其反室維夏之初勞費既  
深又違積事夫民數歲乃遇一除散之如此今二麥方  
荀而亢陽為虐吏任其咎所不敢述惟民何辜  
賴神終惠能致雲雨則實在神向其念之故告  
又惟神含德體仁鎮茲東夏與雲致雨澤施八  
齊邦近在山趾方夏久旱麥苗將萎吏思其絲

望而人微言賤不能上動頻陰復散忽已兼旬念此疲  
民弊於征斂方歲之富食常不足一遇災害必捐溝壑  
惟神威烈覆被羣生顧此北州宜先蒙賜豈伊靈眷獨  
忍遺之是用飭遣士民布誠洞下情窮詞急冀獲哀矜  
使一雨霏然則倒懸可  
解尚其降鑒無作神羞  
又維泰山歷古至今有天下者巡狩封禪勒成告代莫  
不之焉或企足動容卒莫能至實卓偉殊尤神明之地  
故天下宗焉二典所記其光靈威烈焯示萬世夫豈他  
山可得而視維齊魯獲仰而事粒食縷衣莫匪陰施今  
邦不雨自四月以迄于茲積水之澤塵起冥冥將稿  
死蝗亦滋生雖政或不良足以致此而百姓何罪宜蒙  
哀矜彼撮土之山勺水之川尚能與民為福錫之有年  
豈非秦山朝出一雲暮澤天下其勢之易易於轉圜而  
比近託麗顧不能憐殆莫之或告或不登多瀆於死茲  
蓋亦艱矣無儲與藏重斂煩使歲一不登多瀆於死茲  
強無知或起乘時聚為盜攘以取誅夷循理安業田間  
之民亦與俱亡奚可不傷鞏受命天子守藩于東敢齊  
以嚴告于靈宮惟神閱人之病助歲之功霑于東敢齊  
變診為豐向俾斯民以牛羊黍稷得承事于無窮  
又謝雨文臣愚行為時之所背言為時之所輕寡儔少  
和眇眇然奇於人而如此敢望信於冥冥屬東轅而

祠廟

進謁託斯文而薦誠眷齊魯之舊邦依大鎮之崢嶸若  
早魁之方驕憂歲事之不登民且瘠於溝壑或推埋而  
死兵冀聰明之響蒼霈膏雨之膏零言丁寧以上訴心  
傲恍而潛驚顧不能以諸世將何以動夫威靈乃不知  
夫神與道而為徒難窺默而難明其虛心也物有來而  
必應其公聽也無憎愛之常情彼大難自大小雖謂小  
吾與善而已矣常一視而持平故微衷得以上徹利澤  
為之旁行或噫為風或震為霆隱然雷出靄然雲蒸澍  
甘人以兼夕滅災氣於無形蓋西極于甸服東屬乎滄  
溟人盈其望物遂其生黍芄芄而擢秀粟藟藟而敷榮  
使時洽遂熄年功可成人食豐乎鍾禱神祀衍乎黍盛  
民相安於田里吏無用於威刑信大恩之莫報而至德  
之難名思所以意激而感深者方涉世之零丁荷降臨  
之不昧知忠信之可憑敢因辭以進謝愧抽思之匪精  
明巡撫王惇告嶽文蓋聞懿垂編錄休翊明時以雄長  
乎五嶽者神之能事也至於奔走天下積致賄施以利  
雨天下者神之能事也至於奔走天下積致賄施以利  
賴此一省者又神之顯惠也則夫雨暘時若固神之當  
先及而亦一方之所私望者矣乃不雨自春迨將中夏  
達乎四境且害三時麥已罔秋禾豈望歲夜值暑暵  
其爽歟且吁受命撫茲惟保釐殫厥心力而已雲行

天子

雨施實仰明神焉勢分固爾也抑吁及庶司或陰蓄僇  
臯有垂威假則神宜罰及厥身顧斯民何辜代服政者  
罹此荼毒耶謹齋明思省遣教授胡大慶告此粵事神  
其歛崇朝之靈渥千里之利則豈惟悖與一方之人慰  
答其望雖神之取信天下輝映今古  
或亦依係矣惟神之聽之哉尚饗  
國朝施閏章祭嶽文維岱為五嶽之長維神為岱宗之君  
自古帝王祭告封禪及海內外士女重趺響臻者無算  
蓋萬物之權輿也閏章視學此邦日夜震恐懼不得賢  
才報  
休命夫賢才者嶽之所生神之所依也其有伏而不出  
者豈神之靳惜與抑求之未盡其道也惟神其啓佑之  
俾終厥職  
無墜厥職  
宋鮮于侁嶽神辭雲蒨蔚兮山之巔瞻嶽靈兮望青天  
嶽巖嶮峭兮磅礴無垠巖嶮嶽嶽兮寧一以為仁草木  
雜而羅生兮人不可名鳥獸蕃而志集兮虞不能知因  
高錯事兮道此躋陞登岱勒成兮胡為而七十二君齊  
余心兮不外高余冠兮甚偉擷芳杜兮為衣披紫芝兮  
作珮柏實兮松華石髓兮蘭英蕙肴陳兮玉案明水湛  
兮清尊誠拳拳兮不寐寐接神兮恍若有言嵩高峻極  
兮生甫與申周道將明兮宣以中興水旱不常兮蟲螟

以災稼穡卒荒兮民生流離勞來安集

兮之子之功祜此下民兮寧遺神羞

明張鐸迎神辭雨淪淪兮風颺颺望神君兮駕赤螭魂

悅恍兮遠祖馳峻坂兮陟長岐望舒為御兮霞為裳豐

隆前導兮電為旗迢遙戾止山東涯蒼虬元豹何紛披

神駒寶馬森相隨瓊瑤聲纍纍鳳凰銜珠光陸離

紛屢舞獻瑤巵坎坎擊鼓揚

巫師願鎮坤維兮祀事孔時

又送神辭雨忽散兮雲英送神君兮駕太清天衢縹

緗兮不可挹忽侘傺兮心驚龍翼輔兮駢闐虎服箱兮

縱橫馳驅海岳返瑤京霓裳霞帔儼同行玻璃流光照

空明玉童時罷雲和笙瓊宮寶宇寂無聲歌萬福受瑤

觥陶陶嬉舞歡相迎願

靈去而來兮奠此羣生

唐馬友庵早春陪使麻先生祭嶽詩我皇盛文物道

化天地先鞭捷走神鬼玉帛禮山川忽下元洲使來遊

紫洞前青羊得處所白鶴怪時年懸飛龍記昭彰化

鳥篇巖風半山水鑪氣總雲烟光搖昇中日霞明五色

天山橫翠微外室在綠潭邊緹幕灰初暖焚林火欲然

年光著草樹春色換山泉伊水來何日嵩巖去幾千山

疑小天下人是會神仙葉令乘鳧入浮邱駕鶴旋麻姑幾年歲三見海成田

宋晁補之調岱祠卽事詩澤南三百里極望橫天雲	端色凝黛諦視初可分崢嶸介印像瀕洞元氣屯頃刻	有變化慘澹殊明昏天行帝出震其位生物元不周	西北川乃東南奔寧知六鼉死竟使三山淪不有是難	傾就維大塊根嘗聞周官說實維天帝孫神靈所鎮守	民物斯存幽明昭一理有道惟常尊不覺下馬拜僮	奴亦遵循迺知正直理足使冥頑敦以此轉世教庶幾	所尊神明法或不懼夜行安得遂以朝好天色萬象開	驚民莫宿太平驛不眠慮絲棼明朝好天色萬象開	渾勢橫恒碣盡支壓齊魯蹲五色冒日觀一握通帝闈	恢拓下摧雍青蒼上氤氳泉石競沮洳烟嵐互紛綸高	舉蹋風海深躡踏火輪波濤捲堆阜一溟渤吞棋枰	視井邑七著藏松樅碧瓦時雙闕紅牆繚長闌願瞻窈	闕容內滌邪垢魂賜臣登絕頂一覽神秀原萬壑射窈	窳三壇矗嶙峋莽不覩項領何能窮賸跟稍指鳧釋	依依數葦亭云松列大夫爵贏識將軍墳瑣屑澗花麗	微崖葑蕀廣大良有以奇險安足論瑰詭有形上頽然	德彌惇得無希夷子傲世逃深榛亦有黃冠士相對如	麋麋此曹嚙草木語道良未聞解榻坐中觀洗心馳大	鈞形氣要得一不然隨物我事亦姑置幽尋聊可勤	初疑無字碑瑩潔敢文又怪玉女井高絕何由淵俯	穿闕仙巖鳥下天壁垠側度五賢堂熊經背透巡劍石
----------------------	-----------------------	----------------------	-----------------------	-----------------------	----------------------	-----------------------	-----------------------	----------------------	-----------------------	-----------------------	----------------------	-----------------------	-----------------------	----------------------	-----------------------	-----------------------	-----------------------	-----------------------	----------------------	----------------------	-----------------------

危素履女蘿柔屣捫揮斤八極遠風來袂軒軒寥廓自  
 無梯猶疑天可竇陰谷不可視恐落魑魅羣安得遂獨  
 往身如黃鵠翻周流遍五嶽採掇芝英繁即欲憩圓嶠  
 或當止崑崙眾真迎我語一笑顏玉溫是中差可樂子  
 胡戀塵樊答此太遺物身閒猶事君重華迹已遠秦漢  
 事方煩成功屬吾宋五禮垂後昆皇帝二載春臣備太  
 史員紬繹自帝典煩識康哉言泥金白玉字願頌無前  
 勲有志類韓愈無書愧文園臣髮將雪素臣心猶日暎  
 今此在林藪跳身同獲猿  
 徒觀眾山小愁絕下天門  
 明王元坤嶽廟詩地開神府自鴻濛作表羣靈控大東  
 萬國朝宗瞻巨鎮二儀生物藉元功青旂曉轉光華麗  
 蒼壁時陳禮制隆陟降有嚴簾陛迥滿空甘雨颯天風  
 飛樓層堞啓星門五岳推先品位尊帝出震隅通象  
 緯靈昭木德奠乾坤百王秩祀崇遺典萬類瞻  
 依肅駿奔鸞鶴去來天路近廣庭鐘鼓自朝昏  
 國朝沈德潛詩闕殿崇東國唯神配極聞鐘沉汶源水香  
 和泰山雲檜柏森靈氣碑銘辨古文升階肅瞻拜萬慮  
 靜紛  
 嚴長明謁岱廟詩太微執斗臨紫宮元精合擬呈卑崇  
 靈威仰尤愛所鍾職諸岱使專厥雄維帝出震開東封

垂旒彷彿君雲中日章月采昌以丰外表嚴毅中抱盛  
 金輿山立壁兩轅蒼麟夾侍搖青鬣先以大角倉精龍  
 眠天察地橫復縱歎海欽漢如長洪莫原厥始要厥終  
 周三千里境未窮高四千丈廓有容天闕上下開梯衝  
 左日右月驚發踈太清宮碧扉則彤云亭社首衛若墉  
 玉符現瑞垵附崧配以太華恒嵩巽開精氣相周通  
 象若侯甸男衛從扶輿匪特以自豐德之博者功亦隆  
 稽古顛頊居空峒奉火為社金為宗禹疆佐之殫靖其  
 導率元武行躡躡窮蛇冠珥追厥蹤倚燭龍燭山曰鐘  
 陰火灼冰冰弗融鳥獸希葦草失芄維靈類眠憂心冲  
 少皞子召來東蒙唐臣陸吾若不逢明威聖者天所工  
 負甲背虎持六犂陽門倒挂樽桑弓竅鑿大塊嘘協風  
 生氣涌出如奔虹吹萬無復天札凶谷氣不痺林不癘  
 時叶光紀心維怕斥棄與馬兼僕僮上之帝所轍鞠訥  
 天庭忽荒神罔恫縮身潛喘夔魑同下奔委羽棲其躬  
 因是六幕交和冲靈迺合孚若陌麾箕舒森畢降凍  
 疑膏液若乳酪醺以昌萬策緩九農奔走唱于復唱唱  
 天子時邁嘉迺庸高居被飭金碧重五禮六樂罔不供奠以  
 奎章  
 蒼璧如青琮天酒地汁粵溶溶  
 二代交洵洵騰書埋玉欺蒼憤豈惟麟鳳來竟慵黍禾  
 茅亦生不叢蹉余八翼慚璩璋茲何意向天門神學才

自媿成牛翮含辭欲吐道弗充迴驢驚見貞石礮重若  
球貝陳三雍披陰未已淚落胸公如天柱頽中峯元神  
陟降應在穹帝晨左右鳴珩瓊曷  
歸乎來爰我衷闔東望雲壠

豐都廟在岱宗坊東神稱豐都大帝配以冥府十王道經  
云豐都為陰氣之主又曰十王之中七日泰山故祀此乾  
隆十三年

賜額曰現因果法輝下有古柏柏頂寄生檜一株根枝鬱茂俗

曰飛來柏廟始于明宏治十四年太監李瑾建

明李欽重修豐都廟記岱宗南麓有廟曰豐都其神為  
北陰豐都大帝配以冥府十王其東為曜靈五閻王而  
左右十司曹官列焉嘗稽道經所載豐都者陰氣之主  
九地之樞機拷罰罪鬼死魂之所也十王之中其七日  
泰山故陸機考罰罪鬼死魂之所也十王之中其七日  
蒿里去泰山僅數百武耳白樂天詩亦曰東嶽前後魂  
北邙新舊骨誠如是則豐都之為廟夫豈嶽麓之所可  
少者哉雖然俗傳收捕遺逮出入死生之說固儒者所

不道也然昔吳道子畫地獄變相於成都民咸懼罪市  
之屠沽魚肉者不集而况崇之以殿陛列之以案牘肖  
之以人鬼嚴之以判燒春磨之刑使人入則肅然凜然  
出則悚然將自去惡以求免刑戮之弗違其為神道  
設教之意顧有復善於此者哉廟創始於太監李瑾時  
宏治十四年也至今歷歲既久風雨所侵剝棟宇榱桷  
蓋瓦級磚與夫丹雘藻繪之飾未免傾圮漶漫嘉靖壬  
戌春齊南守安陽宏齋翟公濤以兩臺專委來督嶽廟  
大工既獲底績乃復以徵請為重修豐都之舉兩臺亟  
為嘉允十日典事賞費取給於香稅而於農民秋毫無  
所干擾經始於癸亥秋七月訖工於冬十月殿宇周廓  
門觀綽垣悉加完治鬼神之像皆重為涅塑煥然一新  
廟西登嶽之路復建岱宗坊三楹自此以至嶽頂方凡  
入又皆立坊以表其名而各揭聯以壯其景金碧輝煌  
映照山河由是泰山之偉觀愈益增矣郡人士咸願刻  
石以紀其事余惟天以春生萬物止之於鞠育而遂字之  
以政養民肅之以刑故曰父母之於民也政教以撫綏  
之仁也鞭扑而告戒之亦仁也上之於民也政教以撫  
之仁也刑罰以警勸之亦仁也陰都之府所司者秋殺  
春興致雲雨發育萬物而北陰都之府所司者秋殺  
之權也公來本以嶽廟為事而其餘力又有及於斯  
者無乃所以警勸下愚而啟其遷善敬德之機耶

升元觀在岱宗坊西久廢乾隆三十五年恭建

行宮於此

圖志

三皇廟在岱宗坊北祀伏羲神農黃帝配以八蜡兩廡祀先醫明宏治間嘗遣中官致祭有御祝文碑今以歲十二月八日致祭為郡人蜡祭之所

泰山道里記

明宏治十六年御祝文粵維三皇建于有極百草聿嘗藥石是資疾痛疴瘵用賴以瘳神聖功巧萬世永賴籙俎既精虔誠斯達敬伸祭奠庶其敬格謹告

朝元觀在三皇廟北初名建封院宋政和八年賜額升元有敕牒碑元至元二十二年張志純重修改朝元有徐世隆碑神祀東華帝君俗謂東嶽福神此則自西南徙建者玉皇閣在朝元觀西北上祀玉皇下為三元洞閣西為比

斗殿明隆慶間建前有人祖殿近改痘神祠

金龍四大王廟在玉皇閣北山東通志稱神為南宋謝緒行四錢塘人隱金龍山宋亡投茗水死明天啟四年以擁護漕河封今號

國朝康熙元年祀此

以上圖志

青帝觀在金龍四大王廟西隋書禮儀志開皇十五年春行幸兗州遂次岱嶽行禮畢詣青帝壇祭焉顧炎武云卽月令所謂其帝太皞也

圖志參道里記

案觀創建無考宋祥符初重修有宋加青帝懿號詔廣生帝君讚御祝文俱入金石記

西眼光殿在青帝觀北金山上明高真院殿西有眼光泉后土殿在金龍四大王廟東北有宋范致君題名



老君堂在后土殿東古岱嶽觀之一隅也唐為老氏築宮

武后賜額曰白鶴已上圖志

泰山道里記自高宗以下六帝一后修齋建醮皆於此觀有雙碑以蓋跌合而東之俗呼鴛鴦碑其字四面每面作四五層書法不一唐碑存於泰山者唯此與元宗紀泰山銘耳顧炎武采入金石文字迤南嶧基微豁皆岱嶽觀故地按水經注曰古帝升封設舍所跨處有石殿存焉在故觀南趾從征記曰中廟去下廟五里屋宇又崇麗於下廟廟東西夾澗岱史載向尚存古松柏十餘株有趙子昂題刻漢柏二字今與樹俱亡是岱嶽觀在元以前為東嶽中廟矣

羣玉庵在老君堂之東祀王母東有亭曰觀瀾西為藥王

殿石渠夾徑建以橋欄庵前有飛鸞泉泰山道里記

東眼光殿在虎山上雍正八年建與西眼光殿遙峙圖志

關帝廟在玉皇閣北康熙乾隆間相繼重修乾隆十三年

賜額曰神威巨鎮廟東有憩亭及露井泰山述記

元君廟在天階坊北元君亦有上中下三廟此其中廟也

觀音閣在元君廟東舊名飛雲乾隆十三年

賜額曰普門圓應

萬仙樓在觀音閣北舊稱望仙明萬歷四十八年建上祀

王母配以列仙中為元君乾隆十三年

賜額曰景會羣真以上圖志

趙國麟詩櫻桃正熟時簫鼓喧清晝遊人集萬仙山靈若馳驟仙人厭繁囂隱約樓巖竇泠泠石上涼終古彈清奏又丹樓倚山椒去是仙居處澗水通瑤池青鳥自來去

斗姥宮在萬仙樓北古龍泉觀也明嘉靖二十一年德藩

重建北為高老橋坊

三官廟在高老橋北明人祖殿故址也

考古錄泰山上有人祖廟不知何取三秦記驪山巔有人祖廟不齋戒而往即風雨迷道長安志曰即秦始皇祠蓋本之史記所云祖龍者人之先也今臨潼志以始皇不應祀典改為三皇廟

元君殿與壺天閣對峙乾隆十三年

曰瓊霄珠照

以上圖志

玉皇廟在元君殿北乾隆十三年

額曰紫垣凝命

圖志

三大士殿在金星亭西

泰山道里記

二虎廟在二天門北祀黑虎故名

泰山述記

增福廟在跨虹橋北西有元君殿北有迎天坊

圖志

元君殿在朝陽洞坊北乾隆十三年

賜額曰靈府慈光北為對松山坊

圖志

大悲殿在對松山北乾隆十三年

賜額曰蓮界慈航北為龍門坊舊有龍王廟上有金母殿

圖志

關帝廟在南天門內舊有三靈侯祠通志稱為周諫官唐

宸葛雍周武也宋真宗東封泰山見三神人於天門因加

封建祠後改置於鳳皇山圮遂移鳳皇山之關帝廟於此

乾隆十三年

賜額曰乾坤正氣

圖志參述記

五賢堂在南天門東北舊祀孟荀揚文韓五子相傳為蘇

源明讀書處

老君堂舊在圍屏峯今圮

泰山志卷十

祠廟

七

萬壽殿舊在虎頭崖東北泰山小史稱萬壽宮又有御香殿亦曰御香亭萬歷四十二年建祀九蓮菩薩竝造大銅鐘一上有御製鐘讚崇禎十四年復增祀智上菩薩殿久圯移像於青帝宮置鐘於後石屋

以上圖志

案二后升祔時先後建祀岱巔竝置祀山下天書觀內

北斗壇在魯班洞北明萬歷間築四面皆門而中通上復為臺曰禮斗碧石並峙多文采俗呼輔弼二星取泰山北斗之義也

圖志

碧霞元君祠在北斗臺東元君上廟也舊名昭真觀宋真宗東封建明洪武時重修劉定之記成化間改署碧霞靈應宮萬歷三十六年重修邢侗記祠南向正殿五間像設及蓋瓦鴟吻簷鈴之類皆范銅為之殿東一間曰東寶庫西一間曰西寶庫儲諸所捐施即漢武帝時所謂梨棗錢也

國朝康熙二十三年

賜額曰坤元叶應雍正九年

賜額曰福綏海宇乾隆七年

賜額曰震維靈嶽乾隆十三年

賜額曰贊化東皇聯曰碧落高居金臺傳妙訣蒼生溥佑木德仰慈恩又

賜聯曰三素雲英扶絳節九光霞纈麗青壇東西兩廡祀眼光送生二母瓦皆鐵冶中為香亭即萬歷中建金闕處東西

御碑亭二南為祠門門前為臺左右為鐘鼓樓門外綽楔三中

曰敕建碧霞坊東安民坊西濟世坊南為大門上有歌樓

東西有二石閣大門外有火池為四方祈謁者焚帛之所

祠內有前明銅碑二門外有雍正十三年裁革香稅碑東

石閣外為更衣亭即岱史稱東公署香稅總巡官舊居處

圖志參以泰安縣志泰山道里記

明在子卿志宮之東南拱抱為五花崖東北迤西則嶽

頂磨崖日觀諸峯蜿蜒環峙三面若屏展前若雙闕由

宮門西下石磴三丈許南俯懸崖下視城郭若畦圃自

城郭望之則崖峯森蔽不能見宮宇此蓋造化靈區真

天奇也

國志碧霞靈應宮今稱碧霞元君祠

明宏治十六年御祝文懿德含宏仁慈廣霈需佑蒼生於

壽域鼓羣品以瞻依茲因彫躬偶爽調攝敬祈聖力永

作康寧特以香帛用伸告祭

益彰靈應福佑家邦謹告

嘉靖十一年皇太后祝文皇帝臨御海宇十有二載皇

儲未見國本尚虛百神萬民無不仰望茲特遣官敬詣

祠下祇陳醮禮潔修禋祀仰祈神貺默運化機俾子孫

發育早錫元良實宗社無疆之慶無任懇悃之至謹告

高誨玉女考略泰山玉女神顯靈于天下其來尚矣世

傳為東嶽女蓋謬說也人心崇尚習舛承訛非特愚夫

愚婦之不知雖博雅君子亦未聞有能考其實者按州

志載嶽頂玉女池馬端臨通考紀池側故有玉女石像

泉源壅濁宋真宗東封先營頓置泉忽湧上升山其流

自廣清泚可鑑味甚甘美王欽若請浚治之像頗摧折

詔易以玉石既成上與近臣臨觀復龔石為龕奉置舊

微而李太白遊泰山詩亦云玉女四五人飄飄下九垓及

觀李諤瑤池記謂黃帝建岱嶽觀嘗遣女七人雲冠羽

衣修奉香火以迎西崑崙真人由是考之則知玉女必

黃帝所遣七女中之修而得仙者後世因之祠于山而

宋元間龕像建觀尤有徵迨我朝拓新殿宇靈應益著

不然則泰山喬嶽之上何緣有此據通考唐詩所載質

益信

劉定之記略泰山絕頂舊有祠祀碧霞元君以其最高  
雲蒸雨降材木易朽風剛勁瓦多飄毀祠不能久今  
副都御史原傑巡撫山東謁祠見其隳墜謀新之銅梁  
鐵瓦琉璃甃甃之堅固丹雘青聖藻繪漆飾之輝煥高  
廣深邃規制增舊其費取諸官而民不知自昔登山捐  
施委諸巫祝妄費不可稽而令紀理之皆有條法云  
邢侗重修碑蓋聞之孔子云質有餘者不飾也碧霞  
宮胡以修也又問之德彌盛者文彌澁中彌理者文彌  
章碧霞宮胡以弗修也夫大室不應春秋致聖華山加  
縉光乎桓相張龍以二干祠堯史晨用王穀表聖東漢  
標爰長諸嶽冠以帝稱廟貌崇閣雄峙州治而碧霞元  
宗靈應宮則巍然托陞抗擢岱椒其列在集仙蒐神道  
錄等編末究元君之始寧襲耳食之謬唯是四嶽避峻  
九山推烈碧霞於斯宮焉要之稅鞅黃帝有虞之所駐  
下臣彷彿可得而言無懷之紛如廣心競設乎壇陔中  
蹕厚集乎瑄玉寢尋無已輝縹若何昭代列皇重厘遣  
貌倖福陋贊策之罔竭醜談其冊典以故明祇惠以  
告倖福陋贊策之罔竭醜談其冊典以故明祇惠以  
豐林下土道乎轂蓋有馬談破其冊典以故明祇惠以  
靡不指奉高以冠帶之儕布衣之醜估販之魁惟願

師比帛則春草難斲黎單筆蕪幣則楊邁朱提鮫文  
白煥供則雲和別樹丁寧埒竿儀則金支翠葆徽章星施  
巖樂則雲和別樹丁寧埒竿儀則金支翠葆徽章星施  
焚燎絳天于噶震學蟬匿畫穀木馬龍駟般轆萬狀不  
可勝窮百千億兆或依藉雜或遙攬乎構木之采或下  
瞰羣情翕赴亦已極矣嶽靈志穆能無應乎竊見明堂之  
虛社調風希霖膚寸澤乎遐表彌天飽其至德所謂追  
錫謙而觀瀟思蒙思惟一人之暨及也元元之衆則  
有疾疢而聚休嘉啟肅各副所懷亦有梁父云亭斂焉聽  
離其驅旅炊施糜之屬益廣金銀鏈銅之用凡此有位  
命其報旅炊施糜之屬益廣金銀鏈銅之用凡此有位  
可無報旅炊施糜之屬益廣金銀鏈銅之用凡此有位  
遊育茅之地飛雲麗日若開寶雞之天席葺葺藉典還  
嶽時子來者前哲今古符則此碧霞宮者胡可以不尊  
明之斷方諸前哲今古符則此碧霞宮者胡可以不尊  
修也胡可以中丞今晉右司馬晉江黃公名克九百五  
十金有奇撫中丞今晉右司馬晉江黃公名克九百五  
前左布政使今撫河南吳江沈公名季文前參政今按  
察使宣城徐公名夢麟議協金迺辦而今左布政使崑  
山李公名同芳積用輸覈起工竟工歲月俱併廟記中  
提衡振節則前按部侍御無錫嚴公名一鵬後按部侍

御海澄温公名如璋今按部侍御燕山蕭公名淳前按  
憲侍御涇縣葉公名永盛今按憲侍御內江李公名應  
魁若前左布政使安慶劉公名尚志今右布政使南昌  
章公名邦翰督糧道參政潛山徐公名堯萃分守濟南  
道參政白河柴公名應乾提學道前副使晉江李公名  
叔元今副使尉氏靳公名於中驛傳道副使南宮韓公  
名策分巡濟南道前副使固始文公名球今副使潁州  
張公名鶴鳴武德道副使承年杜公名廉濟南知府今  
陞副使甫田俞公名維宇今濟南知府歸安丁公名浚  
皆與有先後督率勞績泰安知州欽縣江君湛然以職守  
終始厥事例宜書州同知賀本昌臨朐縣丞吳復金承  
委克竣宜附書岱廟記先撫黃公作何以螢燭嗣光碑  
當有辭辭曰泰山巖巖萬物伊始帝冊帝孫儻元君是  
呼吸上通僅尺有咫膚寸八荒人事甚邇四嶽苞祇四  
流道迹唯岱是宗靡敢抗壘先民有言神怪譎詭我儀  
圖之祐善殄否萬方玉帛走不停頓孰云奉高有道如  
矢巍然仙居棟厦宜庇疇新茲宮我無則以  
靈篇載韜神司其匪發函燭霄皇乃受祉  
郭詔銅鼓記略予寅長右韓熙臺潘先生政暇嘗登斯  
山感獻遺之物而懼其殄也乃白諸巡撫大中丞南皋  
王先生鑄銅鼓四竅其心置橐籥焉以象四時鼓萬物  
生長收藏又為之鼎附之瓶以達細組之氣其知所謂

鼓之舞之以盡神者與猶未也又欲顯道神德行各識  
以銘其鼓文云元氣鼓萬物春差爾岱神乎神氣再鼓  
麗朱夏品物亨乃神化孰鼓舞秋乃收物之府神之休  
消而息爾鼓爾物歸根元資始其鼎文云大德曰生辨  
香維誠人在洪爐左右和平其瓶文云不平者情不私  
者平神馮人哉人馮神哉吁淵乎微矣可以幽贊於神  
明矣子故為之記示  
後世有考焉已矣

皇

國朝韓錫胙元君記統古今天下神祇首東嶽而東嶽祀  
事之盛首碧霞元君元君者泰山玉女元君其封號也  
廟在泰山頂自京師以南河淮以北男婦日千萬人奉  
牲牢香幣喃喃泥首階下前代設官徵稅充度支陶允  
宜詩云自是神人同愛國歲輸百萬助昇平者是也我  
御極詔永免其稅於是遐邇來禮元君者風雨相續其  
衆多什伯前詩云夫玉女何神也道藏云金虹太乙定  
父女也蓋東嶽為天孫天官書織女亦為天孫因其名  
曰孫遂撰金虹以爲之父因織女天孫為女竝東嶽亦  
牽合而為女也瑤池編云黃帝會西崑崙真人遣女七  
人雲冠羽衣往泰山迓之玉女乃七人中一人彼六人  
者又何往乎玉女卷云玉女姓金名玉葉西牛國孫寧  
府奉符縣石守道妻也漢明帝中元七年四月十八日  
生年十四入天空山黃華洞修道天空山即泰山也攷

秦李斯從始皇登封出玉女於岱宗之巔因祀之稱爲神州老姥是玉女早見於秦時何有漢明帝時降生事况中華無西牛國或即浮屠家所云四大部洲之西牛賀洲者果爾亦當在身毒國西相距不知幾十萬里無論西牛國無郡縣之制泰山郡無孫寧之號而強以彼地天空山指爲中華泰山且謂玉女有夫也瀆亦甚矣文獻通考云泰山頂有玉女池池水苦濁則山已有玉女名宋真宗登封命王欽若先營頓置池中清泉涌出詔易池旁石刻女像以玉奉以石龕而祭之則前此山固事元君住翠微則唐以前已有元君神號而明楊時久事元君住翠微則唐以前已有元君神號而明楊時喬乃謂宋真宗授天書特假設元君名俾五方易於信從胡臆斷若此歟近世佞佛者云觀世音千百亿化身在南爲海神天后封碧霞元君在北爲泰山玉女亦封碧霞元君皆一人也首楞嚴詆十種仙爲卑華嚴舉山林晝夜諸神悉屬諸護法聽經之列顧艷玉女天后二神之靈而胥實以觀世音又有刻洞賓集者載洞賓與梓潼俱授記佛前俚鄙誕幻無稽不經不足辨也然則元君何神也泰山在魯境魯賜天子禮樂得郊禘郊該社郊園丘上帝社方澤地祇也齊桓公九合諸侯自以爲帝王受命不過此欲並魯用郊禘然方以尊周室爲名因託言欲封禪封禪郊社之變名也管仲知不可窮

以辭亦托言符瑞未臻以阻之故郊社一岐而封禪禪再岐而符瑞符瑞又岐而神仙也祭義園丘稱秦壇方澤稱秦折說者云秦壇魯郊泰折魯社皆在泰山左右也秦壇事上帝以人像之則冕旒王者泰折事地祇以人像之則翟禕后夫人又漢時祭泰折亦以夫人主祀從其類而格之也又漢武封禪禪石闕當時以爲仙人之問禮如祀后土即後世所附會黃華洞石屋也然則元君地祇也且夫父嚴而母慈胞孕乳哺出於母而其出之者母不自知之天尊而地親五材百貨產於地而其產之者地不自明之所謂神也今于萬男婦欲祈年免病求嗣保壽日躋崇巒猿攀蟻接泥首元君前皆人世吉祥應有之事而神即如其意佑之非若金泥玉檢冀長生不死爲人世不應有之事乎如形焉歟予之也孔子曰祭神如神在則必洞乎其形焉歟乎如聞其聲焉以情推之朝夕其所謂如者在將如日之圓而烈月之盈而虧乎祭門巷竈中雷其如在者亦將如門之闔如巷之透迤如竈之曲突與夫中雷之滴瀝乎抑別有冠裳坐立之形似以盥鬯而陟降者乎易泰折而宮室之貌地祇而珈珮之是靈爽之集百福之縈也謂非天下之正神乎敬以告後之君子俾有所取信焉

劉策碧霞宮詩一嶂凌霄漢中藏玉女家仙旛搖碧落  
寶殿擁朱霞映日裁雲錦隨風散雨花登臨多少客不  
惜路

途除

姜鏡詩誰開梵宇碧雲岑雲去雲來山半陰石澗暗穿  
瓊玉砌天花時散蕊珠林隨緣好釋區中念遠勝真同  
物外尋最是燕臺看咫尺霞光遙映帝城金

東嶽廟在元君祠東北從征記所謂上廟在山頂卽封禪  
處也元張志純重修明嘉靖間巡撫曾銑繼之

國朝乾隆十三年

賜額曰資始惟元又

賜額曰上摩蒼昊

西北爲青帝宮李戴重修乾隆十三年

賜額曰慈天廣祐

以上圖志

西爲後寢宮明稱神憩宮內設元君卧像乾隆十三年

曰德溥坤輿亦有兩配殿繚以周垣

圖志參用泰安縣志

孔子廟在望吳峯前舊爲過化亭其後因建廟於其地明  
嘉靖萬歷間朱衡郝大猷查志隆相繼修葺

國朝康熙十五年吳雲楊霖重建礮石爲像乾隆三十五年

奉

建舊基之南廟三楹中肖先師像而以四配分侍左右恭

懸

書額曰因高喻大其前有坊李樹德題曰望聖蹟

圖記參用泰山道里

記

明毛在春秋上丁祝文維聖天縱惟岳降神大哉孔子  
優聖絕倫乾坤化育帝王經綸岱宗仰止振衣登臨一



時過化萬載洪鈞肅瞻廟貌吾道常新涓茲楮仲敬薦明禋

玉帝觀在玉皇頂古稱太清宮明成化十九年中使以帑金建修隆慶六年萬恭撤觀於巔北出巔石而表之

國朝乾隆十三年

御題

額曰妙運無為聯曰統馭羣靈端紫極細縕真宰肇元功

元君廟在岱陰獨足盤東北內有萬松亭後改彌勒殿自東而上為蔚然閣下祀呂仙東為三官殿圯移像於元君

殿西舍明隆慶六年胙城大輔國將軍睦槐建有禁約碑

萬歷崇禎間州人徐靈哉王度皆讀書於此

泰安縣志玉女山廟曲徑參差軒牖爽豁門外俯臨深溪杳靄無際松崖石竇間煙雲往來都非人間恒境

採芝庵在岱陰明月嶂泰山紀事云張景巖結茅修煉於

此曾產紫芝一本因名今亡

四陽庵在岱東南屏風巖前一名潛仙舊趾在庵西南明萬

歷初道士柴慧庵修煉處州人蕭大亨移建於此

呂仙祠在虎山東南岱道村中萬歷間建宋熹有碑記以上

采真記郡城北三里許有呂公祠羽客心元子所創建也心元姓韓氏世居泰山下幼業儒稍長權子母隱於市與世溷同不自崖異五十而契元理捐家累絕塵緣栖心淡漠擇林麓佳處結茅為屋壘嶂環列一水曲瀲大有武陵風景乃構宇祠呂公飄飄然黃冠道服矣構甫成見有羽流蓬首麻履而至貌類病者踞坐簷柱下移時乃去詰旦復來投之金錢甌炊泔弗顧也兩足浮腫履穿趾露而行步如飛心元微覺其異尾而目送之瞥然已失所在始悟為呂公來也而追無從矣嗣是道念轉堅屏嗜去慾齋神保和動而行之郡人士稍慕其靜篤余獨心好之結方外交泊祠久類敝不蔽風雨郡庠司訓胡君乃捐貲為改創遷呂公而虔事焉客有譏其隘者余歎曰是惡知仙哉仙道倏忽變化虛倒景大鵬蚊蛇焦螟嵩山芥子須彌毫光六合而蝸殼而大千而溟海而蹄涔而斗室而嶠壺



樵鬢插野花紅樹陰歌擔  
說山鬼笑指峯門有路通

田同之詩竹林何處窳招提占絕境鳥鳴林  
壑幽泉澗雲霞冷雨後更奇絕半天懸寺影

徐祖望詩誰將一幅李營邱引我來從畫裏遊紅葉沒  
崖和雪積白雲帶石過溪流馬蹄欲滑苔痕凍樵逕將

開草色愁僧老寺荒人  
不到探奇偶雨一尋幽

孫岳巘詩中峯雷偈處精舍竹間遮半夜滴山雨一籬  
開槿花葉垂知鳥立草動見蛇斜欲其深公語禪心隔

涯水

普照寺在岱西南凌漢峯南相傳是唐時建金大定間奉

敕重修明永樂間高麗僧滿空

國朝康熙初崇川僧元玉先後卓錫於此寺東有元玉別構

石堂自為銘左右題凡十二旁為元玉塔有淄川唐夢齋

志銘西南為滿空塔

圖志

李傑詩半林殘日映崔嵬上有孫公舊講臺竹帛銷沈  
書院廢鼓鐘鞋靴梵宮開酒傾秋露浮杯滿曲送春聲

入座來清景留人歸路  
晚碧雲紅葉擁山隈

邵賢步前韻詩招提隱隱倚崔嵬紺宇周環般若臺斜  
日短筇山徑曲石橋流水寺門開浮屠證果真成幻儒

道淵源有自來千載清風  
仰石獨遠堂址向巖隈

碧峯鳥語溪聲斷續山光雲影玲瓏  
釋奚林詩門前幾曲流水寺後千尋

東溪行薛徑依花入烟林蒼藹轉  
巖樓寡生計曳杖  
蟲鳴溪頭多磐石坦如几榻平下映寒泉水潺湲流有

聲偶從石上坐蕭然寡所營野景怡幽意浩歌抒素情

樵人不我顧伐木遠丁丁  
口夕攜筇返雲根影與井

趙元昌詩松風橋畔舊山僧猶記新詩說  
上乘三笑溪頭人去後石堂踪跡一遺燈

孫岳巘詩刈茅覆淺屋編竹護頽牆清磬度流水寒山  
空夕陽莽苔紛古色花鳥悅晴光盡日僧無事安禪坐

畫長

岱

三賢祠在岱西南投書澗西即泰山上書院也舊有石介記  
勒壁今亡黨懷英曰孫明復石守道築室泰山下以為學館  
屬大關嶽祠壩基甫迨乃北徙山麓元好問曰泰山書院唐  
周朴所闢宋孫明復居之明嘉靖中按察僉事盧問之安孫  
石神位於此顏曰仰德堂後又合祀胡瑗為三賢祀春秋致  
祭有授經臺講經臺諸石刻今鄉人稱為上書院者即此康  
熙五十一年學政黃叔琳知州徐肇顯重建乾隆四年知府  
蔣尚思重修二十四年郡人宋為燹重修圖志參述記泰安縣志泰山道里記  
嘉慶二年知府金榮督訓導周桐諸生蔣大慶賈佩榮重修

石介泰山書院  
記文入金石記  
黃叔琳重建三賢祠碑記岱宗之麓有三賢祠祀宋安  
定胡先生泰山孫先生徂徠石先生也三賢曷以祠以

命

生平無媿為人師而魯人尊重乎其道教澤千年不  
也祠廢興遷徙具累朝志述中迄茲荒圯無存歆薦何  
闕予以康熙戊子奉  
學山左行部訪其遺址崇巖嵯峨間水紆折即安定投  
書處也後為授經臺異石林立幽巖特至想當山風四  
號人蹟屏絕燈青榻古師友講誦道氣悠然可仰而庭  
構民焉曷從矜式遂應州人士之請割俸興復舊規爰  
屬州牧徐君親新墀而司教王公董其役粵庚寅秋九月  
告成棟宇觀新墀軒敞肅儀晉謁神爽儼憑典型斯  
在矣嘗考人材學術莫醇於宋代然當天聖慶歷之朝  
最稱嚮治猶多忠佞雜糅枉直紛軋雖學禁未行而  
議滋起以韓范富杜諸公齟齬出入而三先生適生其  
間抱元聖遺經於荒山野水之濱訂殘補缺累月窮年  
至不問家人事其視名利仕進泊如也朝賢薦達時起  
時廢幸相次入為國子師得以聞發聖言訓習來學生  
徒向風講舍恒滿矣天子時或臨雍賜緋召直邇英名  
卿大夫折節問道所蘊略施矣然世為三賢惜者咸謂  
位不其德用不殫其才遺書微直道終緬獨其學  
術文章立身行己卓示天下後世者固不以名位為輕  
重也當石先生遇仁宗革政踴躍歌頌別白賢姦佐賜  
賞罰人多指目為狂且怪幾至貶身後之禍然當時信  
心不惑以正道為己任以清議為國維嗟乎使三先生

邁熙豐紹聖之政其呼籲憤激何如哉又或際宣和靖  
 康之時其慷慨赴蹈何如哉信乎英風浩氣宜自謂勇  
 過子輿氏也宋初文治尚沿五季陋習經學積久方顯  
 而三先生實為之倡泰山著尊王發微表章麟旨安定  
 自江南訪學十年不歸研析異同用意專確厥後荆舒  
 之學肆行春秋廢斥至南渡而始復徂排擊佛老詆  
 諷浮薄自以周易教授其鄉傳述甚眾嗣有雜中康節  
 之圖伊川之傳易理愈明溯諸先河後海實為濬程邵  
 之源啟康侯之派者也三君子氣局斂舒風議參覈亦  
 不必盡同要諸忠孝仁義培養於性真公正廉直昌明  
 於著作窮餓不以易其操謔不以挫其志俗情世故  
 不以亂其學斯固言行坊表大節同歸千百世後求為  
 經師人師者均足勵頑懦而化鄙俗矣按志金元以來  
 有孫石兩先生祠後迺以安定合食暨祀孫石於州城  
 舊制湮廢余以三先生行孚義洽今欲明尊師取友之  
 道理宜從合詎可闕諸或疑胡先生葬歸淮海績祀蘇  
 湖未必降依茲土因借援江都董宅嶺表韓祠以明瞻  
 世大賢神無不在豈謂海陵千里不歆此岱麓一瓣香  
 哉予嚮讀遺文舊史久依景行竊幸潔宇羞芹藉據因  
 敬且謂士君子居其地則尚其賢今試聽澗溜之  
 靜對書臺之巖嶺風晨雨夕思何以罔愧切磨而几筵  
 肅穆杖屨如存師弟子偃僂何掖之風升降髮鬣巖巖

新宮濟濟多士蓋念魯邦瞻止蹶然興起矣乎州牧徐  
 君肇顯振興儒教而司訓王公董治有方祠成復飲置  
 旁翼三楹以資護守石先生後裔猶多有讀書樸藝之  
 士因得其裔孫州廩生維巖以守祠之任界之庶幾永  
 保勿替云

宋詩詩尋幽度危嶺遠眺出青林上有孫石臺芳草一  
 何深晴烟披薛壁流水若彈琴清冷聽不厭悠悠契我  
 心當年青紫客身世已銷沉

黃叔琳重修三賢祠詩泰山巖巖萬仞高徂徠疎峙仍  
 在魯玉書麟筆窮秋毫四十不婚亦不仕雲邊結屋勸  
 營茅石公英年負奇氣躬耕嘯吟談伊臬平生得師撰  
 杖屨掘衣北面趨承勞嗟哉晉唐古禮絕東山六逸狂  
 呼喚當時韓柳抗師席蜀日越雪人曉曉自從兩公力  
 返古接武泅泅儀羣髦在三大節總不負鳳凰翹野鸞  
 鳴霄泰山潛心釋魯史得統元和陸淳氏紛綸三傳競  
 戈矛獨揭尊王鬯微旨十二編中斧鉞存忠厚簡易無  
 岐軌公卿嘉禮達官求著書耽寄名山趾海陵儒宿胡  
 先生實學傳薪闢荆枳參覈陽秋喜有鄰負囊千里來  
 依止朝窮叩擊晚鑽研十稔風光猶尺咫妻孥瑣屑亂

人意不問平安書一紙淙淙曲澗瀉虛無鄉音付與東  
流駛至今送水謝纖塵一片精心照清池三賢已矣靈  
光殘魯人歆祀授書壇肅穆衣冠同一字巉如壘峙三  
峯寒不知何年化平地溪毛並繼春秋祭幽壑無光座  
石淒吾徒合抱千秋媿重興棖榭臨高臺巖冠竦帶神  
歸來良師在前畏友並間高弟相追陪雞晨風雨連  
晦夕講筵仍對巖花開生前讓銷與毀鑠轉為金玉增  
晶瑰理山義海壽穹壤豈與名劫沉飛灰拜酌寒泉進  
看醜明靈肝蠶思悠哉魯國諸生嗜奇古前修儼在憑  
樽俎試挹三賢片藻芳應思六籍耕耘苦大賢之後澤  
未湮胡公別記淮南譜泰山子裔苦飄零儒官義恤還  
鄉土能文尙有徂徠孫道義磨礪念爾祖作歌未足暢  
儒風聊於名

韓伯端重修三賢祠詩尼山不作木鐸香道學陸沉經  
義擾斯文振起在吾徒主持風教誰師表幸哉有宋慶  
歷間天使三賢聚泰山爬梳遺編互相發畏友良師共  
鍵關孫公首著尊王論微言直探麟經蘊崇實務本訓  
後人退守廉隅甘困頓守道先生實親炙篤學尙志憂  
時迫力排邪佞氣昂藏獨愠羣小遭退斥闡發經學有  
胡公訓士雅飭容止同太學取法風一變榜花強半出  
門中可怪高名人所計阻過三賢官無異臧倉而今安

在哉三賢遺蹟傳芳事講堂舊著泰山阿祠宇飄搖蔓  
薛蘿百年曾煩數公慮一旦功成臺史過祠新儒雅肅  
瞻視想見三賢同講肄高臨書  
澗誦遺篇至今英爽滿天地

三陽觀在岱西南香水峪東舊名三陽庵明嘉靖時德藩

建鍊士王三陽廬此萬歷間重建于慎行為記

于慎行碑記岱宗之陽為凌漢之峯其下曰香水峪山  
坳平壤壇衍如坻俯臨谿谷雜樹蔚蔚泉石鏗鏘蓋嶽  
之奧區也而僻在嶽岑罕粵之間遊客居人無能至者  
嘉靖辛亥東平道士三陽王公窮遊四域徧歷名山將  
歸而隱於嶽麓乃攜其徒華陰雲山皆公輩周爰相慶  
得是地而樂之伐木薙草鑿石為窟以居德藩二三常  
侍嘉其苦行捐貲相助稍營葺廬居莊嚴神宇未竣  
而雲山承之廣結眾緣大興締造彌歷三紀結瑤構瓊  
輝映巖壑四方道俗香火醮祝歲無虛月萬歷壬辰予  
嘗從二三客子躡屐東遊降自嶽麓由孫石書臺之後  
陟峻嶺三里轉而北行遂至觀下入門三重得磴道而  
上有殿有閣又左為客寮四楹以待遊鑣階下有泉匯  
而為池羽人飲焉閣後有洞方廣丈許命曰朝元晉公  
居之由閣左上磴道數曲茅亭三五碁置松間葱蘢構

參不秋而慄峯之半壁孤亭出焉顏曰木未登是而望  
忽若飄撇上騰以臨雲霓神霄芙蓉諸峯環之如展青  
入天倪南俯川陸勢盡數百里徂徠梁父挹左右以  
朝於嶽汶水出其下茫茫如練蒸為浮煙長天平野混  
以返照丹翠異色斐回嘯歌暮不得下填之月出東峯  
風林颯颯憑闌上下顯氣迴舍如沈銀海脚骨悚慄不  
可以雷信乎仙聖之秘境寰寓之夫觀也嗟夫以是地  
之名勝列在三宮空洞之天歷數手而灌莽有知者而  
雲山之流乃能得其奇而山川之蹟亦得入而與吾曹  
逐逐利名汨沒白首進而羈於風塵退而牽於家累曾  
不能探奇選異自卜菟裘於煙霞窈窕之境徒遊而心  
慕之視雲山之流其亦可愧也夫秦山下離故多列真  
之迹如傳所稱稷邱君安期生尤其蓄壽雲山之流豈  
嘗受其寶訣而有所得與三陽名陽澤雲山名復明觀  
舊以庵名予為更之俾重修山門以恢厥制復度其徒  
張守香為東道主若將從  
而棲焉姑因其請而記之  
劉敕詩日暮下山去還過道世家膏與黃草沒石磴白  
雲斜遙見千峯樹恍疑二月花天台不可覓向此臥烟  
霞

于慎行詩半嶺通仙界縈迴嶽麓西已看三觀迴  
萬峯低暮雨瑤華落春雲玉洞迷遊情渾未減縹緲  
梯丹

趙元昌詩道院行廚淨玉鐘照人山色話  
偏濃斜陽未肯尋歸徑更上青山天外峯  
釋元玉詩秋光遙望歛雲枝山色清憐歲晚時澗底野  
香流杜若徑邊病羽墮螽斯枝臨幽地禽聲絕烟斷斜  
陽樹影移得句書空仍  
自笑峯巒擬共筆爭奇

無梁殿在岱西南仙人掌前祀玉皇殿前有閣祀元始天  
尊皆以石為之州人王無欲所建也東南有會仙庵故址

淵濟公祠在岱西南白龍池上岱史云宋元豐五年封白

龍為淵濟公建祠禱雨輒應

宋趙合撰淵濟公廟記元王  
天挺撰靈異記俱入金石記

天書觀在汶陽橋北宋史大中祥符元年封祀制置使王  
欽若得天書於泰山西南垂刀山下靈液亭北因建觀於  
此殿廡三所前祀元君像中為九蓮菩薩後智上菩薩智  
上九蓮皆范銅鍍金為之門西有醴泉祥符中建亭於上  
顏曰靈液今圯北有鐵浮圖十三級明嘉靖十二年造又  
南有門樓三間乾隆十一年燬於火西有宋翠陰亭故址

志圖

顧炎武聖慈天慶宮記泰山之西南麓有宋天書觀大  
中祥符年間建後廢為碧霞元君之宮前一殿奉元君  
萬歷中尊孝定皇太后為九蓮菩薩構一殿於元君之  
後奉之崇禎中尊孝純皇太后為智上菩薩復構一殿  
於後奉之乃更名曰聖慈天慶宮而按察使左佩玆為  
之碑宮成於十七年之三月京師淪喪即此月也竊惟  
經傳之言曰為之宗廟以鬼享之又曰為天子父尊之  
至也孔子論政必也正名昔自明太祖之有天下也命

獄瀆神祇竝革前代之封正其稱號而及其末世至以  
天子之母太后之尊者不足重而必假西域神號以為  
崇豈非所謂國將亡而聽於神者耶然自國破以後宗  
廟山陵之所在樵夫牧豎且或過而慢焉而此二殿獨  
以託於泰山之麓元君之宮焚香上謁者無敢不合掌  
跪拜使正名之曰皇太后固未必不可使天下之人虔  
恭敬畏之若此是固大聖人之神道設教使民由之而  
不知者乎其與宋之託天書以夸契丹者相去遠矣以  
其事為國史之所不及載故序  
而論之俾後之人有以覽焉

泰山道里記案天書即欽若所為黃素書也當時君臣  
相欺侈言祥瑞其書詞見三朝符瑞志龍圖閣待制孫  
奭曰天何言哉豈有書也

大佛寺在岱西南大埠嶺

谷山玉泉禪寺在岱東北佛峪上元魏時僧意降錫處金  
釋善寧重建東有古井曰玉泉東北而上為藥師七佛閣  
元至元間釋普謹建久圯



金党懷英碑記元杜仁傑記  
閻復七佛閣記俱入金石記

皇姑庵在望仙臺東南以上圖志

仁育庵在岱東北青山北四里岱覽

會仙觀在岱東北門家墅元至元間建道士孟養浩修煉

於此旁有方井井四洞淵泓莫測圖志

元鹿森會仙觀  
記入金石記

元都觀故址在岱西北清風嶺下石厂之側泰山道里記

傅老庵故址在岱西北映霞峯述記

碧峯寺一名鐵佛寺在岱西北老鴉峯東南明建今圯

桂師庵故址在岱西北鞞轆峪

元君廟在岱西北襍負山西南內有玉皇殿及鐵佛殿鐵

佛從碧峯寺移祀以上圖志

古雲臺庵舊在襍負山東南明正德間釋道轉重建三教

堂碑今廢泰山道里記

青龍宮故址在大倒溝西岱覽

黃姑庵在岱西北五峯頂東北

白姑庵在岱西北黃石巖以上圖志

案古樂府東飛伯勞西飛燕黃姑織女時相見黃姑河  
鼓轉音即牽牛也白姑無所攷或因黃姑而傳會之耶

藏峯寺在岱西北駱駝嶺西南元延祐六年創建明重修

有碑記圖志並泰安縣志

龍駒寺在岱西北三縮山圖志

延慶院在岱西北黃山宋釋海定重建元明皆重修額曰

雲臺寺志

資福寺在郡城岱廟東南初名冥福禪院唐開元間創建後唐釋智順後晉釋志隱相繼增修偽齊劉豫時釋海巖重建改曰崇法禪院元修之

國朝乾隆五十七年知府徐大榕重修易今名並於寺東建代麓書院

金榮重修資福寺記資福寺在郡城北門內西去岱廟百數十武即唐之冥福禪院也歷代沿修具有碑誌歲久傾圮碑亦闕有存者人都漫漶不可識嘗考金石錄所載寺始於開元盛時奉敕創建其後主院僧以廟稍狹乞於朝敕賜大地十段其本院坐落長潤積三千二百餘步約十五畝有奇中為大雄寶殿前為天王殿以其餘地為常住為香積為知容館何其盛也自晉天福以降時修時圮蓋幾使千百載之禪林化為瓦礫之場矣茲非守土者之責歟前郡守毘陵楊菴徐公莅任之三年撫寺故址而慨然爰鳩工庀材以復之又以泰山書院在嶽晏門外移建城內以便諸生誦習因析寺址之半為諸生書舍數十間設講堂於上期年工竣仍

為建大雄寶殿三楹天王殿三楹右為關帝伽藍殿而在釋典以莊嚴佛土為真實功德佛土謂心也今資福院主果能莊嚴己心以事佛則心盡而福隨之在儒曰自求多福諸生果能心以事天立命之學內治其心學至而福亦隨之然則持君子之戒慎君子之說也視履考祥之道也即佛法去貪嗔癡戒殺盜淫之心清淨則生實相其旋元吉福身之道也即金剛經信心清淨則生實相行一切善法則得阿耨多羅三藐三菩提之說也儒言福善釋亦言福善亦視乎人之資取之耳余繼楊菴來守斯郡於課諸生之暇過資福寺瞻拜史胥環請曰徐使君復修此寺工甫竣而需畢具更乞余一言勒諸貞珉也於是輸募兼行而所需畢具更乞余一言勒諸貞珉因允其請其輸金姓名具碑陰嘉慶二年四月立石金榮資福寺施燈油田記蓋聞象教之闡厥有傳燈良以智炬迭持啟光明藏乃能燭彼迷津爰茲覺路故循法嗣者宗之若善知識願效皈依即心是佛因佛見心心安資福寺為前郡守楊菴徐公所重修余視事後復增設几案帷幄諸未備旣勒石以志緣起矣吾母奉佛惟謹謂是莊嚴已具檀施宜崇命建燈幢月捐俸錢以蕪之余祇承焉罔敢懈歲戊午量移濟南過去之燼弗畱

未來之耀孰續不有常住其何以繼佛日之輝長明勿替乃置鳳凰莊地十二畝有奇與僧耕獲藉福田之餘息承資火傳瞻禮衆生欣普照焉夫人之善施視力所至正如燈炷隨其大小而發光明惟益膏油明乃不絕華嚴偈云善財然法燈信炷慈悲油念器功德光滅除三毒闇準是以虔申供養結香燄雲敷師子座雖謂一燈之灼然百千燈無滅無盡可也又奚侈炷如須彌山油如大海水始證琉璃光遍映大千界耶用諗寺僧使護守之嘉慶三年十一月勒石

龍王廟在資福寺南即宋封白龍為淵濟公也乾隆三十年知縣程志隆以白龍池淵濟公祠久廢始建祠城中關帝廟故會真宮也在龍王廟東即古奉高宮宋真宗東封齋宿地即以宴羣臣父老者也內有玉皇殿成化十八年重修有學正任式記萬曆二十二年八月初七日燬於火後即故址改建關帝廟歲時致祭焉

圖志參述記

任式記會真宮玉皇殿成當有碑刻以紀其歲月式齊沐拜手言曰一氣之分而輕清上浮者謂之天主宰乎其間者謂之帝吾儒曰昊天上帝彼道家者流尊其名曰昊天玉皇上帝世之曰宮曰觀皆其奉香火之地也二聖功德碑在宮之陽其創建不可考觀宋祥符間有頌許傳者謂真宗封泰山駐蹕於此金大定間徙奉符縣為泰安州故宮居州城之東隅與替摩常所存者僅玉皇殿三間瑞基卑下上遣中使進香帛於方嶽行瞻是祠從衆望并以嶽頂昭真祠上聞欲更新之上可其奏即下命所司時歲在庚子也於是召公輸於魯甸招匠石於郢郊採徂徠之松新甫之柏是斷是度是尋是尺辛丑昭真觀既作玉寅玉皇殿告厥成巍乎浩浩乎松栢有樾旅觀既有閑粉飾藻繪妍麗精華金碧耀日月之光丹青奪乾坤之秀像設穆赫爾厥靈誠以昭我聖代敬天事神之意無乎不在也若夫泰山徂徠相映前後奇花吐而玉座芬芳白雲飛而瑤壇空靜星冠羽衣舉手以加額者祝聖天子於萬壽也黃童白叟羅拜於左右者祈斯世斯民於平康也嗚呼天不在於高而在於咫尺帝不在於冥冥而在吾昭灼過之者寧不秉虔恭存敬畏以思無負於對越也

魯兩先生祠在關帝廟南祀宋孫明復石守道今名二賢  
祠舊在岱廟東偏卽兩先生講學舊館金大定十九年卽  
其地建祠党懷英記明成化間知州胡瑄建祠於此吳寬  
記天啟中知州侯應瑜重修

國朝順治十年學道施閏章修

岱覽參泰  
山道里記

金党懷英記

吳寬記魯兩先生者爲宋泰山先生孫公明復徂先  
生石公守道也祠始建於今泰安州治之西而鄰於嶽  
廟金源時遂爲廟併元改建於岳麓已而復爲浮屠氏  
據入國朝乃附祠於州學而規制狹隘祀事簡率無以  
慰魯人之思至是州守前進士德清胡君瑄言於巡撫  
山東左副都御史無錫盛公謂其事係於風化慨然  
奏請於朝事下禮部議從之仍俾有司每歲仲春祀以  
羊一豕一秩爲常典於是胡公復請於藩臬諸公擇地  
得於州治之東南以成化十三年八月建祠焉工未畢  
盛公以請老去而眉山吳公來代益重其事趣成之他

日胡君以書來請記於予大人君子所以能使人人追  
崇者非區區未學所知願請之之意堅不可已也惟兩  
先生生宋盛時泰山來自平陽而寓於魯其學長於春  
秋著尊王發微簡易公平多得經之本義一時名公賢  
士高其學行至妻以女或就見之范公富公交薦其賢  
始授官官止殿中丞徂則生於魯者當孫公退居泰  
山之時實師事之其爲人好善嫉惡嘗著怪說中國論  
及唐鑑以爲世戒而慶歷聖德詩尤爲人所傳頌常以  
經術教授於鄉後在太學益以師道自居太學自此而  
興初舉進士甲科官止太子中允蓋兩先生平生見於  
歐陽文忠公墓誌而國史取以爲傳者其大略如此按  
其言論世信其爲大賢君子卓然出乎流俗而表爲一  
方之望者也故在當時並爲人所尊仰至卽其所居山  
不得盡其用若徂徠之剛直旣沒而禍忽作幾不能保  
其遺骸而底其妻孥蓋小人之不相容亦勢之所必至  
者也今去之六百年雖天下知有兩先生而魯爲所寓  
所產之地道德之風藹然有存宜人尤尊仰之祠象煥  
焉而不至於卒廢人心之公不能自己如此而歐陽公  
所謂發先生之光者今則愈久而愈光矣兩先生葬處  
有後而石差繁復遷其入學充弟子員魯人之思庶

幾慰之因併載其事俾刻之祠下云  
施閏章記往讀歐陽氏所謂孫明復石守道兩先生墓誌銘偉其文嗟異其人久之過泰安州有兩先生祠知為先生遊息講業之所因為文以祭之入其祠頽檐漏瓦門垣不飭几筵不具而兩先生像獨存其儒衣冠上坐者孫先生侍坐者石先生也孫先生觀者皆嘆息與起進士不第退居泰山之子禮甚恭魯人先生觀者皆嘆息與起必侍登降必扶執弟子禮甚恭魯人觀者皆嘆息與起今觀其像如生時余不覺流涕夫兩先生學成行立傳於後世無可哀者余獨念兩先生躬耕力行居泰山徂練之間雖嘗官於朝而不久其位不大臣尤中奇禍至困人所嫉謗石先生作慶歷詩褒譏大臣尤中奇禍至困諸生從之宰相卿大夫折節下之以薦於天子天子加禮蓋行修於身而不可掩也自宋迄今六百餘年祠祀春秋不廢魯人無賢不肖皆稱曰泰山孫先生徂徠石先生而不敢名泰山徂徠兩山遂若為兩先生所獨有而向之姦人乘權嫉謗者影響俱泯且不得與草木等太史公曰富貴而名磨滅不可勝紀惟倜儻非常之人稱焉後之有志於道者其母味於利而怯於義毋競刀錐之末而失邱山之重亦可以自壯矣而吾儕承先人

之訓遊聖賢之鄉不敢為不肖而竊恐其未逮不免  
草木同盡此後人之所以可哀也既撤祭召兩先生之  
理問蘇君署州事予出四生承基問其遺書已不存會  
文倡為之助蘇君既謀始而州守曲君允斌至又踵治  
之屬武舉張子所存董其成乃訖工夫聞先生之風者  
思見其人謁祠而見其像如生俎豆肅然感  
與者必眾乃刻石告諸生且將以自勵焉  
王奕詩師生高占二山名千載誰云道義  
輕岳府柏林風雨夜琅然猶帶讀書聲  
胡瑄詩奎星聿應兩先生泰岳徂徠相對青司諫謾勞  
歌聖德聚徒惟解授遺經分來洙泗源頭水贏得歐陽  
石上銘明主崇儒專廟  
祀百年師道有餘馨

和聖祠在魯兩先生祠西北多明人石刻歲時祭焉  
泰山道里

長春觀舊在岱廟西北元初知州張郁建女冠誓守慎修  
真於此賜號妙真觀圯有中統二年元和子記碑  
泰山道里記

梳粧院舊為白雲觀在岱宗坊西南郡城北門外西北隅  
明萬歷間周藩奉國將軍勤鯤建祀王母其後增祀元君

圖志參泰  
山道里誌

靈派侯廟在郡城西南後晉天福六年建其神舊稱漆河  
將軍又曰通泉侯宋真宗東封泉水方涸俄有清流涌出

賜封靈派侯圖志

宋元碑記  
入金石記

靈應宮在社首山東元君下廟也廟初無攷明萬歷三十  
九年奉敕拓建賜今額有張邦紀碑記前後殿各五間南  
有崇臺上為金闕俗名銅樓棟宇欄楯以及像設皆范銅  
鍍金為之萬歷時欽造舊在岱頂碧霞祠內後移置於此

山道里  
記並圖志

沈廷芳銅樓歌泰山城外古道院殿宇插漢何清幽人  
門老樹互撐拄中有突兀縹緲之飛樓樓高丈餘廣袤  
稱軒窗闌楯工雕鏤上作元君道真相銖衣瓔珞垂鞋  
旒童男姪女傍雙鶴楮榜楹帖蟠蛟虬是皆檀谷銅所  
鑄工緻與古六氏倅騰光輝彩射烈日觀者莫敢張兩  
眸不知何代始製此羣言勝國宮掖祈神麻初安太清  
宮穹碑並列峩峩峯頭繼遣兵燹禍遠自山頂昇至城西  
陬邪許費盡萬人力移置高壘如崇邱我來登臨覽四  
周摩挲銅狄慨嘆五百秋昔閭夏氏鑄鼎象物怪始用  
貢金恒遲欲仙階邀福徒營求金人十二肇泰始佛塔  
作事恒遲欲仙階邀福徒營求金人十二肇泰始佛塔  
應真創自錢漢雷即如明初武當殿演南鸚鵡堪匹傳  
方其盛時尙過舉廟在中葉迺縱禱祀無疆謀我欲銘  
之班泉府重是舊物還夷猶作詩書壁示炯鑒日斜風  
繁旌旆熱吁嗟乎金泥玉簡典禮盡  
虛幻茲樓微物曷足重懷千古憂

相公廟在社首山上神稱東嶽輔相見宋胡元資記石或  
謂趙韓王者誤圖志

高里山神祠在高里社首二山之間額曰森羅殿初建無攷元至元二十一年明成化二年及萬歷間俱重修圖志

亭亭山神廟在亭亭山漢書地理志泰山郡鉅平注有亭亭山祠宋真宗大中祥符元年封山神為廣禪侯遣秘書

丞直史館姜嶼致祭元知州張郁知縣張仝重修圖志

地主祠在梁父山史記八神二曰地主祠泰山梁父漢武帝及光武皆降禪於此今壇址並失圖志

感應侯祠在徂徠之陽獨秀峯下祀徂徠山神金明昌元年封為護國感應侯今圯泰安縣志參泰山道里記

二聖宮在徂徠之陽乳山下舊稱二聖堂元初開國侯徂陽時珍建有高詡碑記後增建玉皇閣王母殿三清殿泰安

縣志參泰山道里記

毛姑庵舊在徂徠之陽乳山西二里今其地稱毛老谷代

泰山道里記元初州人毛仙姑居之修持三十餘年臨

雷頌表定軍節度時宥為紀石於墓遂稱其地為毛

聚泉庵俗稱大庵在徂徠之陽藥山泰山道里記

古四禪寺在徂徠之陽團山下北齊河清二年建金元重

修乾隆三十四年秋大雨山水橫溢寺基無存泰安縣志參泰山道

里記

法雲禪寺在徂徠之陽他山下金大定二年釋福燈建有

敕牒碑泰安縣志

隱仙觀在徂徠之陽小普陀巖南祀呂純陽內有玉帝閣

三清殿明萬歷中有于仙翫虛闕此岱覽參泰

趙州庵在徂徠之陽演馬嶺上圯僅存呂仙閣中為北斗

殿俗呼團瓢下為三皇廟人稱徂徠七十二觀寺此其尤

者岱覽

光化禪寺在徂徠之陽薤山上搆於元魏宋祥符間賜號

曰崇慶元初時珍重修有高詡碑記岱覽並泰

成城宿光化寺詩山近尖濃翠精廬返照明到門千樹

合過澗一僧迎水石澄寒色松風起梵聲此時塵鞅客

大悲庵在光化寺東北里許圓瓦崖泰安縣志

三清殿在徂徠山陰中軍嶂前康熙間建泰安縣志

神化庵在徂徠山陰牛山之南泰山道里記

玉帝閣在徂徠西北麓卽金党懷英所居竹谿庵故址康

熙間建泰安縣志

靈巖寺在靈巖山廣袤三里殿閣層暉明汪子卿志云舊

在泰安治內今屬長清距登封之地九十里峯巒聯屬其

實統曰泰山而曰靈巖其別名也蓋嶽志之不可遺者

泰山道里記案北魏孝文帝本紀太和三年起靈泉殿

思遠佛寺於方山遂屢幸焉迨正光初僧法定復興拓

建曰靈巖寺見宋郭思石橋記碑隋文帝本紀開皇十

五年旅玉符疑卽此寺舊址在甘露泉西唐貞觀時徙

於西南麓宋熙寧間移建於此仍額

靈巖有敕牒碑歷代修葺制加詳焉

大門內三橋相竝中曰聚善東曰虎谿西曰接引明時重

建二門內碑石林立東西為鐘鼓樓其南為天王殿

橋北為大雄殿殿七間祀觀音文殊普賢卽宋之獻堂及



山門本無像設者明正德間魯藩增置

國朝乾隆二十二年

賜額曰卓錫名藍聯曰奇松爾日猶回向詭石何心忽點頭兩

翼齋廡東為韋馱殿西為觀音堂由甘露泉遷此

大殿北為五花閣上祀三大士下祀圓通菩薩西為彌勒

殿又西曰魯班洞上為十王殿鏡池西北為千佛殿殿七

間中祀毘盧漆藤為之配以藥師彌陀范銅為之左右小

佛千餘即唐貞觀中僧慧崇所移建者宋拓修之明嘉靖

間重建萬歷間重修

國朝康熙五十三年僧淨意重修東北為御書閣慧崇建靈

巖志稱唐僧陳元奘譯經處有大觀時仁欽篆書閣額萬

歷間重刊靈巖志誤以為貞觀御筆也北上有超然亭圯

今為方丈禪堂

宋曾鞏題靈巖方丈詩法定禪房臨峭谷碎支靈塔冠

層巒軒窗勢聳雲林合鐘磬聲高鳥道盤白鶴已飛泉

自漫青龍無迹洞常寒更聞雷

遠相從樂性道塵器豈可干

元傅亨靈巖方丈語舊詩秋晚登臨上岱宗扶筇來此

謁崆峒間雲送雨過深洞老鶴將雛度遠空白石清泉

心未了黃花秋葉思無窮攜書

歸隱知何日坐想青山入夢中

閣東為后土殿西為般舟殿西南為碎支塔塔九級每級

門四牕六皆磚石為之唐天寶中建宋嘉祐間重修元明

相繼修之西偏為藏經殿乾隆十四年燬於火其後為倚

翠亭迤西為和尚林有唐天寶中慧崇塔及宋元塔銘西

北為松風閣稍西為朝元殿由甘露泉移此南下為關帝

廟

后土殿東為定公殿圮又北為玉皇殿自韋馱殿東為轉輪藏內為孔雀佛殿附近改為公館東為達摩殿由甘露泉移此

寺門外南為方山神祠東南有伽藍殿西南為地藏庵東南為藥師佛殿思議佛殿竝祀自伽藍殿東過仙人巖為白衣殿星月樓及維摩庵皆圮

池上有接引佛殿圮

以上泰山道里記參岱覽

唐司空曙遊靈巖寺詩春山古寺繞烟波石磴盤空鳥道過百丈金身開翠壁萬龕燈燄隔烟蘿雲生客到侵衣濕花落僧禪覆地多不與方袍同結足下歸塵世竟如何

李迪留題靈巖寺詩靈巖山勢異金地景難窮遮層漢鐘聲落半空千尋羅雉堞萬仞聳屏風

張揆宿靈巖寺詩再見祇園樹流光二十年依然山水地況是雪霜天閣影移寒日鐘聲出暝煙麓官苦奔走一宿亦

孔舜遊靈巖寺詩忽從平地出塵籠親到諸天釋梵宮却悟元官長役物爭如大士日談空山橫青壁千屏合泉逆丹崖一線通幽鳥靜嘯人外境疎鐘不墜世間風目無可欲猿猴伏心絕微塵水鑑融自恨無緣陪晏坐他生願効

蘇轍詩青山何重重行盡土囊底巖高日氣薄秀色如新洗入門塵慮息盪漱得清泚升堂見真人不覺首自稽祖師古禪伯荆棘昔親啟人跡尚蕭條豺狼夜相舐白鶴導清泉甘芳勝醇醴聲鳴青龍口光照白石陞尚

可滿畦勝豈惟濯蔬米居僧三百人飲食安四體一

念但清涼四方盡兄弟何言庇華屋食苦當如藿

元趙文昌題壁詩路入藤陰石徑涼馬頭遙認贊公房

兜羅天近雲煙濕婆律風清草木香紅鶴飛來山隱隱

平生病拄杖真須到上方

李岳詩上方重閣喜登臨山氣霏微向夕陰棲鳥伴雲

歸寶塔落花隨雨散香林清泉脉脉流名古蒼柏森森

闕歲深一扣禪關觀衆

妙更須何地豁幽襟

明徐毅詩二首山霏微石徑斜上方臺殿寂無華春

深尚有殘紅跡知是優曇第幾華四面山開翡翠屏

碧梧修竹兩亭亭老僧定起

推窗坐自啟琅函誦貝經

王守仁和菴頌韻客途亦幽尋窈窕穿谷底應土墳

胸臆到此乃一洗仰視劍戟鋒噴吼額如洗俯窺蛟龍

窟匏伏首若稽異境固靈秘茲遊實天啟

簷牙相角觚山僧出延客經營設酒醴

更歷堂陞石田惟種椒晚炊乃有米臨燈坐小榻榻榻

齊

王應鵬別靈巖寺詩落日青天迥登樓一面碧峯片雲翻

絕壁疎雨過深松塔自空中突泉於樹杪重吾師如惠

即相從

徐中行詩列岫圍丹壑諸天出翠微雲霞明客路薛荔

暗禪扉御墨金為榜神僧鐵作衣塔窺青漢上鐘裊白

雲飛揮塵深元理忘筌學息

機乍如逢慧遠日暮澹忘歸

傅國宿靈巖寺詩二首祇林全失日鷺嶺暗生雲珠翠

春常社香花午不分風搖金塔影雨繡銀袈裟不用愁

供給松間墜露芬燈寒開貝葉夜靜掩松扉清磬聞

林杪幽人語翠微餅餐婆利淨茶挹露華翻坐久諸天

落客衣

神寶寺在靈巖北峪北魏正光初僧法定初建今廢有唐

碑泰山道

神通寺在琨瑞山西北舊稱朗公寺水經注云苻堅時沙

門竺僧朗居琨瑞山大起殿舍連樓臺閣即此元和郡縣

志云神通寺在歷城縣東七十里琨瑞山中泰山道里記云琨瑞山西北為神通寺隋開皇三年文帝以通微屢感故曰神通也其制門閣兩重北為大雄殿東曰伽藍殿西曰達摩殿北為千佛殿圮北為方丈東為禪堂又北為法堂兩翼齋廊寺西地敞豁舊有藏經堂轉輪藏鐘鼓樓圮又南一臺有四門塔極崇麗皆石為之塔前古柏一株九頂蒼秀傳云漢植其東有宋三壇寺宰堵波因石鑿成紹聖間潘卞為撰銘又東有染池龍洞泉西北隅曰朗公塔制最古岱覽並泰山道里記

抱病試與問如何  
李攀龍神通寺詩相傳精舍朗公開千載金牛去不迴初地花開藏洞壑諸天樹杪出樓臺月高清梵西峯落霜淨踈鐘下界來豈謂投簪能避俗將因臥病白雲隈

泰山志卷第十

祠廟



